

POPERA GA YUDÍUGÜ GA YAXŌGÜXÜCA_X ÜMATÜXÜ

Tupana rü Nanewa tamaã nidexa

¹ Nuxcüma ga Tupana rü muëxpüxcüna rü nagüxüraüxüãcüma norü orearü uruüğüwa tórü oxigümaã nidexa, rü namaã nüxü nixu ga tacü nüxü na nanaxwëxexü.

² Natürü i ñomaücüü ya Tupana rü Nanewatama nixi i tamaã yadexaxü rü tüxü nüxü nacuëxëëxü na ñuxäcü tüxü nangüxëëchaüxü. Rü gumaxü nixi ga namuxü na naxüãxüçèx ga ñoma ga naãne rü daxüguxü ga naãne rü üèxcü rü tauemacü rü woramacurigü rü ëxtagü. Rü ñuxüchi guma Nanena nanana ga guxüma ga yema na noxrü yiixüçèx.

³ Rü Nanewa nixi i nüxü idauxü na ñuxäcü namexëchixü i nüma ya Tupana. Rü nüma ya Nane rü Nanatü ya Tupanarüütama nixi. Rü ñuxma na guxüärü äëxgacü yiixü ya Nane, rü guxümaãma inacuëx rü norü ore i poraxümaã nanamu i guxüma na nüma nanaxwëxexüãcüma na yiixüçèx. Rü nüma ya Nane nixi ga taxcèx nayuxü na nüxü rüxoexüçèx ga tórü pecadugü. Rü yemawena rü Nanatüxütawa naxü i daxüguxü i naãnewa. Rü yéma Nanatüärü tügünecüwawa nayarüto erü guxüärü äëxgacü nixi i ñuxmax.

Tupana Nane rü guxüma i orearü ngeruüğü i daxü- cüãxétüwa nangëxma

⁴ Rü ñuxma i nüma ya Nane rü guxüma i Tupanaärü orearü ngeruüğü i daxücüãxärü yexera

nixĩ rü naetüwa nangẽxma yerü yemaãcü nanaxuegu ga Nanatü.

⁵ Rü ngẽmaãcü nixĩ i ñuxma yerü ga Tupana rü taguma wüxi ga norü orearü ngeruũxũ ñanagürü: “Cuma nixĩ i Chaune. Rü ñuxma chanangoxẽẽ na aixcüma Chaune quiĩxũ”, ñanagürü. Rü taguma wüxi ga norü orearü ngeruũchiga ñanagürü:

“Choma nixĩ i Nanatü chiĩxũ rü nüma rü Chaune nixĩ”, ñanagürü.

⁶ Natürü yexguma ñoma ga naãnewa namuãgu ga Nane ya guxüetüwa ngẽxmacü, rü ñanagürü ga Tupana:

“Chanaxwẽxe i guxüma i chorü orearü ngeruũgü i daxücüãx rü nüxũ nicuèxüüügü ya Chaune”, ñanagürü.

⁷ Rü yexguma norü orearü ngeruũgü ga daxücüãxchiga yadeaxgu ga Tupana, rü ñanagürü:

“Choma chanaxwèxexüãcüma chanamu i ngẽma chorü orearü ngeruũgü i chorü ngüxẽeruũgü ixĩgüxũ. Rü ngẽxguma chanaxwèxegu rü ñoma buanecü rü ñoma üxüemarüũ chayaxĩgüxẽẽ, rü chanaporaexẽẽ na naxügüãxüçèx i chorü ngúchaũ”,

ñanagürü.

⁸ Natürü yexguma Nanechiga yadeaxgu ga Tupana rü ñanagürü:

“Cuma rü chauxrüũ Tupana quixĩ. Rü guxügutáma ãẽxgacü quixĩ. Rü aixcüma meã guxümaã icucuèx erü aixcümacü quixĩ.

9 Rū nūxū cungechaŭ i guxūma i ngēma nacūma i mexū natürü naxchi cuxai i guxūma i ngēma nacūma i chixexū. Rū ngēmacèx i choma na Cumatü ya Tupana chiixū rü guxāētüwa cuxū changēxmaxēē rü guxāārü yexera cuxū chataāēxēē”, ñanagürü.

10 Rū yexgumarüŭ ta Nanexū ñanagürü ga Tupana: “Cuma rü guxūārü Cori quixī. Rū noxriarü ügügumama ga yexguma natauxgutama ga ñoma ga naāne, rü cuma nixī ga cunaxūxū. Rū cumatama nixī ga cunaxūxū ga üèxcü rü tauemacü rü guxūma ga ēxtagü.

11 Rū guxūma i ngēma rü tá nagux, natürü i cuma rü guxūgutáma cüngēxmaēcha. Rū guxūma i ngēma rü ñoma naxchirurüŭ tá nangaue.

12 Rū ñoma wüxi i naxchiru i ngauxū i ngēma itèxmarexürüŭ tá ícunawogü i ñoma i naāne rü guxūma i daxūwa nūxū idauxū. Rū to i ngexwacaxūxūmaā tá cunaxüchicüü, ñoma wüxi i naxchiru i ngauxū i ngexwacaxūxūmaā ixüchicüüxürüŭ. Natürü i cuma rü tá cunaxèixrügumaraxūēcha rü tagutáma cuyu”, ñanagürü ga Tupana.

13 Rū Tupana rü ñanagürü nūxū:

“¡Nuā chauxütawa rüto ñūxmatáta nūxū cuxū charüporamaēxēē i guxūma i curü uwanügü!”

ñanagürü. Natürü ga Tupana rü taguma yema ñanagürü nūxū ga ngēxürüüxū ga norü orearü ngeruügü ga daxūcūāx.

14 Rū guxūma i Tupanaārü orearü ngeruügü i daxūcūāx rü naāēgü i Tupanaāxū puracüexū

nixĩgü. Rũ nüma ya Tupana rũ núma nanamugü na nüxũ yanangũxẽẽgũxũcèx i guxũma i ngẽma duũxũgü i Tupana naxwèxexũ na nayauxgüãxũ i maxũ i taguma gũxũ.

2

Tama name i nüxũ taxoe i ngẽma maxũ i Tupana tüxna uaxũxũ

¹ Rũ ñuxma na nüxũ icuáxũ na guxũma i Tupanaãrũ orearũ ngeruũgü i daxũcũãxãrũ yexera yĩxũ ya Nane, rũ ngẽmacèx name na yexeraãcü meã naga ixĩnüèxũ i ngẽma ore i nachiga ixĩxũ. Erũ tama tanaxwèxe na nüxũ rüxoexũ na yaxõgũxũ.

² Rũ yexguma tauta Nane ya Cristuxũ núma namuxgu ga Tupana, rũ norũ orearũ ngeruũgü ga daxũcũãxgüwa duũxũgümaã nüxũ nixu ga norũ mugü na naga naxĩnüèxũcèx. Rũ yema mugü rũ aixcüma napora yerü guxũma ga yema duũxũgü ga tama naga ñnüèxũ, rũ yema mugü nüxũ ixũãcüma Tupana nanapoxcue.

³ Rũ yexguma yemaãcü napoxcueãgu ga yema duũxũgü ga tama naga ñnüèxũ, ¿rũ ñuxũcürüwa i yixema i naxchaxwa ibuxmüxũ na tama tüxũ napoxcuexũcèx ega nüxũ ixoegu i ngẽma maxũ i mexèchixũ i ñuxma Cristugagu tüxna naxuaxũxũ? Rũ dücax, nümatama ya tórü Cori nixĩ ga nüxĩra naxunagüãxũ ga yema maxũ, rũ ñuxũchi yixcama nixĩ ga yema nüxũ ñnüèxũ ga nüxĩ meã tüxũ nüxũ nacuèxèèxũ na aixcüma yĩxũ i tüxũ nangèxmaxũ i ngẽma maxũ ega nüxũ yaxõgügu ya Cristu.

⁴ Rũ nümatama ga Tupana rũ ta taxcèx nanangoxèè na aixcüma yĩxũ i Cristugagu tüxũ nangèxmaxũ i ngẽma maxũ. Yerü nüma

ga Tupana rü Naãẽ i Üünexüwa tüxü nanawêx ga naguxûraxüxü ga taxü ga mexüğü rü cuèxruxüğü ga norü poramaã naxüxü yema nüma nanaxwêxexüãcüma. Rü yemaãcü nixĩ ga wenaxârü tüxü nüxü nadauxêêxü na aixcüma yïxü na Cristugagu tüxü nangêxmaxü i ngêma maxü.

Tupana rü ñoma ga naãnewa nanamu ga Ngechuchu ya Cristu na taxrüü duïxüxü yïxüçèx

⁵ Rü ñuxma rü guxüma i ngêma mexüğü i Cristugagu tüxü ngêxmaxü i pemaã nüxü tixuchigaxü, rü Tupana rü taguma daxüçüãx ga norü orearü ngeruüğüna naxâga na namaã inacuèxgüxüçèx. Natürü duïxüğüxü nixĩ ga namuxü na namaã inacuèxgüxüçèx ga guxüma ga yema mexüğü.

⁶ Erü Tupanaârü ore i ümatüxüwa rü ñanagürü: “Pa Tupanax, ¿rü tacü nixĩ i duïxüğü rü ngêmacèx nagu curüxĩnüxü? ¿Rü tacüwa name rü ngêmacèx nüxü cungechaüxü?”

⁷ Rü paxaãchi curü orearü ngeruü ga daxüçüãxgütüüwa cunayexmagüxêê ga duïxüğü, natürü i ñuxma rü aixcüma namaã cutaãê rü nüxü quicuèxüxü.

⁸ Rü naxmêxwa cunangêxmaxêê i guxüma ga yema cuxüxü”, ñanagürü i ngêma orewa. Rü yemaãcü nixĩ ga Tupana ga duïxügümêxêwa nayexmagüxêêãxü i guxüma i ñoma i naãnewa ngêxmaxü. Rü nataxuma i tacü i ñoma i naãnewa i tama naxmêxwa nangêxmaxêêxü. Natürü woo na ngêmaãcü yïxü, rü ñuxma rü ta tauta nüxü tadau na duïxügümêxêwa nangêxmaxü i guxüma i ñoma i naãnewa ngêxmaxü.

⁹ Natürü nüxü tadau ya Ngechuchu ya aixcüma guxümaãma icuácü. Rü yexguma Tupana ñoma ga nañewa namuxgu rü paxaãchi norü orearü ngeruü ga daxüçüãxgüarü ñaxtüwaama nanaxüxëë. Natürü i ñuxma ya Tupana rü poraãcü Ngechuchuxü nataxëë rü ãëxgacü ya tacü nayaxixëë yerü ngúxü ninge rü guxüma ga duüxügücèx nayu yerü yemaãcü nanaxwèxe ga Tupana yerü tüxü nangechaü rü tüxü narüngüxëëchaü.

¹⁰ Yerü ga Tupana rü nanaxwèxe na guxüma i naxãcügü nüxü nangëxmaxüçèx i nachica i mexü i naxütawa. Rü yemacèx ñoma ga nañewa nanamu ga Ngechuchu ya Cristu na ngúxü yangexüçèx rü taxcèx nayuxüçèx na aixcümaxüchi tüxü nangëxmaxüçèx i maxü i taguma gúxü. Rü name nixí na yemaãcü naxüãxü ga Tupana yerü nümatama nixí ga naxüãxü ga guxüma rü namëxwa nangëxma na nüma nanaxwèxexüãcüma namaã inacuáxüçèx.

¹¹ Rü Ngechuchu nixí ya tüxü imexëëgücü na Tupanapëxewa ixüünegüxüçèx. Rü ñuxma i nüma ya Ngechuchu ya tüxü imexëëgücü rü guxãma i yixema na tüxü yaxüünexëëgüxü rü wüxitama nixí ya Tanatü. Rü ngëmacèx nixí i nüma ya Ngechuchu ya Tupana Nane, rü tama taxcèx naxãnexü na naëneëgümaã tüxü naxuxü.

¹² Erü Tupanaärü ore i ümatüxüwa rü ñanagürü ga Nane:

“Rü chaueneëgüxü tá nüxü chacuèxëë i cuchiga, Pa Chaunatüx. Rü norü ngutaquëxegüwa rü tá cuxcèx chawiyae na ngëmaãcü cuxü chicuèxüxüçèx”,

ñanagürü.

¹³ Rū toxnamana i Tupanaãrū ore i ümatüxüwa rü ñanagürü ta ga Nane:

“Cuxü chayaxō, Pa Chaunatüx, erü nüxü chacuèx rü tá choxü curüngüxëë”,

ñanagürü. Rū ñanagürü ta:

“Rü daxe chixĩ, Pa Chaunatüx, namaã i cuxacügü i chaueneëgü i choxna cumugüxü”,

ñanagürü.

¹⁴ Rū nüma ga Ngechuchu rü woo Tupana na yixixü natürü duüxürüxüãcü ñoma ga naanewa naxü na taxruxü naxãmachixüçèx rü naxãgüxüçèx na tachicüü nayuxüçèx rü yemaãcü yanaxoxëëãxüçèx ga Chatanáarü pora ga namaã tüxü iyanatauxëëxchaüxü.

¹⁵ Rū yemaãcü nanaxü ga Ngechuchu na Chatanámeëwa tüxü ínguxüxëëxüçèx ya guxãma ya yixema noxri naxcèx muüëxë ga na tayuexü.

¹⁶ Rū yemacèx ñoma ga naãnewa nangu ga Ngechuchu na taxcèx nayuxüçèx i guxãma i yixema na Abráürüü yaxõgüxü. Rū tama daxüçüãx i orearü ngeruügüçèx nayu, natürü taxcèx nixĩ ga numa naxüxü rü nayuxü.

¹⁷ Rū nüma ga Ngechuchu rü nanaxwèxe na yixema i naëneëgü ixïgüxürüütama nügü na yaxixëëxü na yemaãcü aixcüma mecümacü ya nüxü ingechaütümüügücü ya tórü chogürüü yïixüçèx i Tupanapëxewa. Rū yemacèx nixĩ ga nügü inaxãxü rü nayuxü na yemaãcü Tupana duüxügüaxü nüxü ngechaüxüçèx i norü pecadugü.

18 Rū yema nūmatama ngúxŭ na yangexŭ ga yexguma Chataná nūxna ĩnūgu, rū ngēmacèx i ñuxma rū nūxŭ natauxcha na tūxŭ nangŭxēēxŭ ya yíxema Chataná tūxna ĩnūxē.

3

Ngechuchu rū Moĩchéxŭ narüyexera

1 Rū ñuxma Pa Chaueneēgü ya Tupanapēxewa Üünegüxe, rū pexŭ nixĩ ya Tupana inadexŭ na norü duŭxŭgü pixĩgŭxŭcèx. Rū ngēmacèx name nixĩ i aixcūma meã nagu perŭxĩnŭē ya Ngechuchu ya Cristu ya Tupana nūma namucü. Rū nūma ya Ngechuchu nixĩ i tórü chogüruŭ i Tupanapēxewa tūxŭ ixüünexēēcü. Rū yimaãxŭ nixĩ i yaxōgŭxŭ.

2 Rū Tupana rū marü Ngechuchuxŭ naxuneta na naxüãxŭcèx ga yema puracü ga Tupana nūxna ãxŭ. Rū nūma ga Ngechuchu rū aixcūma Nanatüga naxĩnŭ rū nayanguxēē ga yema puracü yexgumarŭŭ ga Moĩché meãma na naxüxŭ ga yema puracü ga Tupana nūxna ãxŭ na nūxna nadauxŭcèx ga Tupanaãrŭ duŭxŭgü ga Yudíugü.

3 Rū woo ga noxri rū Moĩchéxŭ nitaégacüüxēē ga Tupana, natürü i ñuxma rū Moĩchéarü yexera Ngechuchuxŭ nixĩ i yataégacüüxēēxŭ. Rū wüxi ya ĩpata ya ngexwacèx ixüxŭnerŭŭ nixĩ, erü woo ngēma ĩpatamaã tataãē, natürü ngēma yexeraãcü nūxŭ icuèxüüxŭ nixĩ i ngēma ĩpataarü üruŭ.

4 Rū guxŭnema ya ĩ rū nūxŭ nangēxma i norü üruŭ. Natürü guxŭma i tacü i ngēxmaxŭ, rū Tupana nixĩ ya naxücü.

5 Rū Moĩché rū wüxi ga Tupanaãrŭ duŭxŭ ga aixcūma mexŭ nixĩ yerü meã nūxna nadau ga

Tupanaãrũ duũxũgũ ga Yudĩugũ, yema Tupana namaã nüxũ ixuxũrũũ. Rũ nũma ga Moĩché nixĩ ga yema duũxũgũmaã nüxũ yaxuxũ ga ñuxãcü Tupana tá yixcũra nüxũ na rüngũxẽxũ.

⁶ Natürũ nũma ya Ngechuchu rũ Moĩchéarũ yexera nixĩ erũ Tupana Nanexũchi nixĩ. Rũ nũma nixĩ i nüxna nadauxũ i guxũma i ngẽma Tupanaãrũ duũxũgũ ixĩgũxũ. Rũ yixema rũ ta Tupanaãrũ duũxũgũ tixĩgũ ega aixcũma Ngechuchuaxũ yaxõgũgu rũ taguma nüxũ rüxoegu. Rũ Tupana nanaxwèxe na guxũguma Ngechuchumaã itaãẽgũxũ erũ nüxũ tacuèx na wũxi i ngunexũ rũ tá taxcèx nataeguxũ na wũxiwa namaã ingẽxmagũxũcèx.

Tupanaãrũ duũxũgũ rũ tá inarüngũẽ

⁷⁻⁸ Rũ ngẽmacèx i Tupanaãrũ ore i ümatũxũwa rũ ñanagürũ i Naãe i Üünexũ:

“Rũ ñuxma na nüxũ pexĩnüèxũ i ngẽma Tupana pemaã nüxũ ixuxũ, rũ tama name na nüxũ pexoexũ, yexgumarũũ ga na naxũgũãxũ ga yema duũxũgũ ga Tupanaxũ ügũxũ rũ tama naga ñnüèxũ ga yexguma Moĩchéwe naxĩxgu ga yema naãne ga ngextá taxúema íxãpataxũwa”.

⁹ Rũ yemacèx ga Tupana rũ ñanagürũ:

“Rũ yéma nixĩ ga chixexũ naxũgũxũ ga nuxcũmaũgũxũ ga perũ oxigũ yerũ choxũ naxũgũ yerũ tama choxũ nayaxõgũchaũ. Rũ yemaãcü nanaxũgũ woo 40 ga taunecũgu nüxũ na nadaugũxũ ga yema mexũgũ ga üünexũ ga napẽxewa chaxũxũ.

¹⁰ Rû yemacèx namaã chanu ga yema duïxügü, rû ñacharügü nüxü: ‘Pema rû guxüguma chixexüguxicatama perüxĩnüëëcha, rû taguma penaxüxchaü i ngëma chanaxwëxexü na penaxüxü’, ñacharügü nüxü.

¹¹ Rû yemacèx nixĩ ga namaã chanuxü ga yema duïxügü, rû aixcümamaxüchi namaã nüxü chixu na tãütáma yema naãne ga noxri namaã ichaxunetaxüwa nangugüxü na ngëxma nangüëxüçèx”, ñanagürü ga Tupana.

¹² Rû ñuxma Pa Chaueneëgüx, rû name nixĩ i pegüna pedaugü na tama ngürüächi pechixearü maxüãxüçèx, rû ngëmagagu na nüxü perüxoexü na Tupana ya maxüçüaxü na peyaxögüxü.

¹³ Natürü ñuxma pexü natauxchagu, rû name nixĩ na wüxichigü pegüaxü penangüchaüxëëxü i guxü i ngunexügu na taxúema i petanüwa Tupanaxü taxoxüçèx nagagu i ngëma pecadu i pexü womüxëëchaüxü.

¹⁴ Rû ngema na Cristuxütawa nayauxgüxüçèx i maxü i taguma gúxü, rû tanaxwae na guxüguma aixcüma yaxögüechaxü. Rû ngëxguma noxrirüütama guxüguma meã nüxü yaxögüechagu rû tama nüxü rüxoegu, rû tá namaã tüxü nangëxma i tachica i daxügüxü i naãnewa.

¹⁵ Natürü ñuxma nixĩ i namexü na meãma yaxögüxü. Rû ngëmacèx i Tupanaärü ore i ümatüxüwa rû ñanagürü:

“Rû ñuxma na nüxü pexĩnüëxü i ngëma Tupana pemaã nüxü ixuxü, rû tama name na nüxü pexoexü, yexgumarüü ga yema duïxügü ga tama Tupanaga ñnüëxü ga yexguma Moïchéwe naxĩxgu ga yema naãne ga ngextá

taxúema íxãpataxűwa”,
ñanagürü.

¹⁶ ¿Rü texégü tixĩ ga guxema nüxű ĩnüëxě ga yema Tupana tümamaã nüxű ixuxű, rü ñuxűchi tama Tupanaga ĩnüëxě? Rü pemaã nüxű chixu rü yemagü nixĩ ga yema duűxűgü ga Moïché Equituanewa ínguxűxěxű.

¹⁷ ¿Rü texémaã nixĩ ga nanuxű ga Tupana ga 40 ga tauncėgu? Rü pemaã nüxű chixu rü namaã nanu ga yema duűxűgü ga chixexű ügüxű. Rü yemacèx yema nachica ga ngextá taxúema íxãpataxűgu nayue.

¹⁸ ¿Rü texégümaã nixĩ ga aixcūmaxűchi inaxunetaxű ga Tupana na tãütáma yema naãnewa nangugüxű na yexma nangűëxűcèx? Rü pemaã nüxű chixu, rü yemagü nixĩ ga yema duűxűgü ga tama naga ĩnüëxű.

¹⁹ Rü ngēmawa nüxű tacuèx na taxucürüwama yema naãne ga noxri Tupana namaã ixunetaxűwa nangugüxű ga yema duűxűgü, yerü tama nüxű nayaxögü.

4

¹ Rü ngēmacèx i ñuxma na Tupana tamaã ixunetaxű na nügüxűtawa tá tüxű yachocuxěxű na ngěxma rüngűëxűcèx, rü tanaxwèxe i taxuãëgü, na tama ngürüãchi wüxie i tatanüwa tama ngěxma taxücuxű.

² Erü ñuxma i yixema rü marü nüxű taxĩnüë i Tupanaärü ore i mexű, yexgumarű ga yema nuxcūmaűgüxű ga duűxűgü nüxű na naxĩnüëxű. Natürü nümagü ga yema duűxűgü rü taxuwama nüxű name ga nüxű na naxĩnüëxű ga yema ore

yerü tama yema naga ñnüëxürüü aixcüma nüxü nayaxögü.

³⁻⁴ Natürü i yixema na yaxögüxü, rü tá aixcüma Tupanaxütawa tichocu na ngëxma rüngüëxüçèx. Rü wüxiwa i Tupanaärü ore i ümatüxüwa rü ngüxchigaarü ngunexüchigaxü nixu, rü ñanagürü: “Rü 6 ga ngunexügu nixi ga naguxëëãxü ga norü puracü ga Tupana. Rü yexguma norü 7 ga ngunexüwa nanguxgu rü guxüma ga norü puracüna narüngü”,

ñanagürü. Rü nuxcüma ga Tupana rü nanaxwèxe na nangüëxü ta ga yema nuxcümaügüxü ga tórü oxigü ga Moïchéwe rüxixü. Natürü ga nümagü rü tama nüxü nayaxögüchaü rü tama naga naxïnüë. Rü yemacèx ga Tupana rü norü ore i ümatüxüwa rü ñanagürü:

“Yema duüxügü rü tama choxü nayaxögü rü yemacèx namaã chanu rü aixcümaxüchi namaã nüxü chixu na täütáma yema naãne ga namaã ichaxunetaxüwa nangugüxü na ngëxma nangüëxüçèx”,

ñanagürü.

⁵⁻⁶ Rü yemaãcü ga yema duüxügü ga nüxira nüxü ñnüëxü ga Tupanaärü ore i mexü, rü tama nawa nichocu ga yema nachica ga Tupana namaã nüxü ixuxü, yerü tama naga naxïnüë. Rü ngëmacèx nixi i Tupanaärü ore i ümatüxüwa i ñaxü:

“Ngëma duüxügü i tama chauga ñnüëxü rü täütáma ngëma nachica i namaã ichaxunetaxüwa nichocu na ngëxma nangüëxüçèx”,

ñaxü. Natürü ñuxma rü ta nangëxma i nachica i tümacèx ya yixema ngëxma Tupanaxütagu chocuchaüxë na ngëxma tarüngüëxüçèx.

7-8 Rū ngēma nachica i ngextá nagu nangüëxü i duüxügü rü tama yema naãne ga nuxcümaügxü ga tórü oxigüxacügü tümaärü ãëxgacü ga Yochuémaã tayauxgüxü nixĩ. Yerü yexguma chi yema naãne yixĩgu, rü Tupana rü tãu chima wenaxärü nüxü naxuneta ga to ga ngunexü na nagu naxütawa yachocuxüçèx na ngëxma nangüëxüçèx i duüxügü. Rü yemacèx ga Tupana rü wenaxärü nüxü naxuneta i wüxi i to i ngunexü na naxütawa yachocuxüçèx i duüxügü na ngëxma nangüëxüçèx. Rü ngēma ngunexü rü ñuxma nixĩ. Rü yemacèx ga Tupana rü mucüma ga taunecü ga Moíchéwena rü Dabímaã nüxü nixu ga yema norü ore ga ümatüxü i ñaxü:

“Rü ñuxma na nüxü pexĩnüëxü i ngēma Tupana pemaã nüxü ixuxü, rü tama name na nüxü pexoexü”,

ñaxü. Rü yematama nixĩ ga ore ga marüchirëx pemaã nüxü chixuxü.

⁹ Rū ngēmacèx i ñuxma rü ta nangëxma i wüxi i nachica i üünexü i nagu tá aixcüma nangüëxü i ngēma Tupanaärü duüxügü ixĩgüxü.

¹⁰ Rū yíxema Tupanaxütawa ichocuxe na ngëxma tarüngüëxüçèx, rü nüxna tarüngüë i guxüma i tümaärü puracügü yexgumarüü ga Tupana rü nüxna na nangüxü ga norü puracügü ga yexguma naãne naxüxguwena.

¹¹ Rū ngēmacèx name na meã yaxõgüxü rü naga ixĩnüëxü na ichocuxüçèx i ngextá Tupana tüxü írüngüëxëxüwa. Erü tama tanaxwëxe na texé ngürüãchi yema nuxcümaügxü ga duüxügü ga tama Tupanaga ñnüëxürüü norü orexü na taxoxü.

¹² Erü Tupanaärü ore rü namaxü rü naporaxüchi.

Rü wüxi i tara i guxücwawa meã waixmaguxüãrũ yexera nixĩ na natéxũ. Erü ngẽma ore rü tawa nixücu ñuxmata taãẽwa nangu, rü ñuxmata nawa nangu i ngẽma wüxichigü nagu rüxĩnũxũ. Rü ngẽmaãcü meãma nanangoxẽẽãma i guxüma i ngẽma yixicatama nagu rüxĩnũxũ rü tüxũ ngúchaũxũ.

¹³ Rü nataxütáma i tacü i Tupana üxũ i tá naxchaxwa nügü icúxũ erü napẽxewa rü guxüma meã nangox. Rü guxüxũ nadau rü guxüxũ nacuèx ya yima tá tüxna çacü na namaã nüxũ ixuxüçèx i tórü maxüchiga.

Ngechuchu rü mecüxüchi ya tórü ngüxẽẽruũ nixĩ i Tupanapẽxewa

¹⁴ Ngechuchu ya Tupana Nane rü mecüxüchi ya tórü ngüxẽẽruũ nixĩ i Nanatüpẽxewa. Rü ñuxma rü daxüguxũ i naãnewa i Nanatüxütawa nangẽxma na ngema taétüwa nachogüxüçèx. Rü ngẽmacèx tanaxwèxe i guxüguma nüxũ tayaxögüecha rü taguma nüxũ tarüxoe.

¹⁵ Rü nüma ya Ngechuchu rü aixcüma nüxũ nacuèx na tüxũ nangüxẽẽxũ erü nüxũ nacuèx na ñuxãcü tüxũ naguxchaxũ i ngẽxguma Chataná tüxna ñnũgu rü pecadugu tüxũ nanguxẽẽchaũgu, yerü nüxna rü ta naxĩnũ ga Chataná, ngẽma tüxna na naxĩnũxũrũ. Natürü nüma ga Ngechuchu rü taguma chixexũ naxü.

¹⁶ Rü ñuxma na tüxũ nangẽxmaxũ ya tórü ngüxẽẽruũ ya Ngechuchu, rü name nixĩ i tama imuẽãcüma nüxna tangaicamagü ya tórü ãẽxgacü ya Tupana ya tüxũ ngechaũcü. Rü tanaxwèxe na ngẽmaãcü nüxna ingaicamagüxũ na nüxũ

ingechaütümüügüxüçèx rü tüxü nangechaüäcüma tüxü nangüxëëxüçèx i ngëxguma guxchaxügü tüxna ngaicamagu.

5

¹ Nuxcüma ga Tupana rü Moïchémaã nüxü nixu na Arãü yïxüçèx ga Yudiügarü paigüeru ixïcü na guma duüxügüétüwa chogüxüçèx ga Tupanapëxewa. Rü guxüma ga yema Arãüwena ügüxü ga paigüeru rü duüxügütanüwa nüxü naxunetagü na yema duüxügarü ngüxëëruü yïxüçèx ga Tupanapëxewa rü Tupanana naxããxüçèx ga ãmaregü rü Tupanacèx nadaiãxüçèx ga naxünagü na yemaäcü nüxü nüxü nangechaüxüçèx ga norü pecadugü.

² Natürü ngëma paigüeru rü guxüma i duüxügürüütama nixï na pecadugu nanguxü. Rü ngëmacèx nüxü nacuèx na ñuxäcü yaxna namaã naxïnüxü i duüxügü i ngëxguma naëchitamare pecadu naxüegu rü tama aixcüma Tupanawe naxïxgu.

³ Rü ngëma paigüeru rü tama ngëma duüxügarü pecaducëxicatama nixï i nadaiãxü i naxünagü, natürü nanaxwëxe i noxrütama pecaducèx rü ta na nadaiãxü i naxünagü na ngëmaäcü Tupana nüxü nüxü nangechaüxüçèx i ngëma pecadugü.

⁴ Rü taxüema tügütama tingucuchixëë na paigüeru tiïxüçèx. Natürü Tupana nixï ya tüxü unetacü rü tüxna naxäcü i ngëma puracü na paigüaru äëxgacü tiïxüçèx, yexgumarüü ga Tupana rü Arãüxü na yangucuchixëëxürüü na paigüeru yïxüçèx.

5 Rū yexgumarüŭ ga Ngechuchu rü tama nügütama ningucuchixēē na Tupanapēxewa tórü ngüxēēruŭ i paigüeru yīxüçèx. Natürü Tupana nixī ga yangucuchixēēcü. Yerü Tupanatama nixī ga nüxü ñacü:

“Cuma nixī i Chaune. Rū ñuxma chanangoxēē na Chaune quiixü”,

ñacü.

6 Rū toxnamana i Tupanaärü ore i ümatüxüwa rü ñanagürü ta:

“Cuma nixī i guxügutáma duüxügüarü ngüxēēruŭ i paigüeru quiixü, guma pai ga Melquisedérüŭ”,

ñanagürü.

7 Rū yexguma Cristu ñoma ga nañewa maüxgu, rü poraäcü nayumüxē rü tagaäcü rü naxauxäcü Tupanana naca na nüxü nangüxēēxüçèx na naga naxīnüxüçèx. Rū yemaäcü nanaxü ga Cristu, yerü Tupana rü napora na nüxü nangüxēēxüçèx na tama yuxü namuüxüçèx. Rū Tupana rü Cristuxü naxīnü yerü nüma ga Cristu rü aixcüma Tupanaga naxīnü.

8 Rū nüma ga Cristu rü woo Tupana Nane na yīxü, natürü ngüxü ninge naxçèx na Tupanaga naxīnüxü.

9 Rū yemaäcü nügü inaxā rü curuchagu nayu na tümaärü maxēxēēruŭ yīxüçèx ya guxāma ya yixema naga ñnüxē.

10 Rū Nanexü nixī ga naxunetaxü ga Tupana na guxügutáma nügüpēxewa tórü ngüxēēruŭ i paigüeru yīxüçèx yexgumarüŭ ga pai ga Melquisedé ga norü yumüxēwa nuxcümaücü ga

tórü օxi ga Abráüçèx Tupanana çacü na guma Abráüxü nangüxëëxüçèx ga Tupana.

Wüxi i ãücümaxüchixü nixĩ na nüxü rüxoexü na yaxõgüxü

¹¹ Rû ñuxma rü toxü nangëxma i muxüchixüma i ore i Cristuchiga ixixü i pemaã nüxü tixuxchaüxü. Natürü naguxchaxüchi na meãma pemaã tanangoxëëxü i ngëma, erü pema rü tama pexü natauxcha na nüxü pecuáxü.

¹² Rû marü ñuxgumama nüxü na pecuáxü i Tupanaärü orechiga, rü pema rü chi marü namaã pengüexëëtae. Natürü i pema rü ñuxma rü ta penaxwëxe na wena pemaã tanangoxëëxü i ngëma Tupanaärü ore i tauxchaxü i nawa inaxügüxü na Tupanachigaxü icuáxü. Rû ngëmaãcü i pema, rü ñoma õxchana i naëgünenixüwa maixürüütama pixigü.. Erü tama nüxü pecuëxgüéga i guxüma i ngëma Tupanaärü ore i yexeraãcü tamaã nüxü ixuxü i Cristuchiga na ñuxãcü Tupana naxwëxexü na naga pexĩnüëxü.

¹³ Rû yixema yaxõxë ya tama nüxü cuëégaxe na ñuxãcü Tupanacèx tamaxüxü, rü wüxi i õxchana i maixürüü tixĩ. Rû ngëmaãcü pixigü i pemax.

¹⁴ Natürü yixema yaxõxë ya tümamaã yaxúxe na tanangugüxü na çacü yiixü i nguxëëtae i mexü rü ëxna chixexü, rü aixcüma nüxü tacuëx na ñuxãcü Tupanacèx tamaxüxü. Rû yixema rü ñoma wüxi i duüxü i yaxü i namachimaã äwemüxürüü tixĩ. Natürü i pema rü tama ngëmaãcü pixigü.

6

¹ Rû ngëmacèx name nixĩ i yexeraãcü tingúetanü na aixcüma meã nüxü icuáxüçèx i

Cristuchiga. Rū tanaxwèxe na nūxū ichopetūxū ga yema ore ga nawa inaxūgūxū na Cristuchigaxū icuáxū. Rū tāūtáma yeūcūrū yema ore ga nawa inaxūgūxūchiga tidexagüecha. Rū taxucèxma tūxcūū wena pemaã nūxū tixu na nūxū perūxoexúcèx na nagu pexīxū i ngēma mugū ga Moīché ūmatūxū i tama tūxū maxēxēēxū. Rū ngēxgumarūū ta taxucèxma tūxcūū wena pemaã nūxū tixu i nachiga na ñuxācū Tupanaãxū yaxōgūxū.

² Rū ngēxgumarūū ta taxucèxma tūxcūū wena pexū tangúexēē na ñuxācū Tupanacèx íbaiūxū rū ñuxācū duūxūgūxū ingōgūācūma namaã iyumūxexū. Rū ngēxgumarūū ta taxucèxma tūxcūū wena pexū tangúexēē na ñuxācū tá wena namaxēxū i duūxūgū i yuexū rū ñuxācū naāneārū gūxgu rū Tupana tá wūxichigū i duūxūgūna çaxū na ñuxācū namaxēxū i ñoma i naānewa.

³ Rū ngēmacèx i ñuxma rū ngēxguma Tupana tama tūxna nachūxgu rū tanaxwèxe i yexeraācū tingúeetanū na aixcūma guxūma i Cristuchigaxū icuáxūcèx rū nūxū na icuáxūcèx na aixcūma ngēma nūma nanaxwèxexūācūma meã naxcèx na imaxēxū.

⁴⁻⁵ Natūrū ngēxguma chi wūxie Cristuxū yauxgu, rū chi meãma Tupanaxū tacuèxgu, rū chi Naãē i Ūñexūxū tayauxgu, rū chi nūxū tacuèxgu na ñuxācū namexū i Tupanaārū ore rū ñuxācū na namexū i daxūguxū i naāne, rū name nixī i taxuāē.

⁶ Erū ngēxguma chi ngēmaācū meã tayaxōxgu i noxrix rū ñuxūchi Cristuxū ítatèxūchixgu, rū marū taxucūrūwama texé wenaxārū Tupanacèx tūxū tataeguxēē. Erū ngēxguma ngēmaācū

ítanatèxüchixgu ya Tupana Nane, rü ñoma wena curuchawa tayapotaxürüü tayaxĩxêê, erü guxü i duüxügüpêxewa ãne nüxü tingexêê.

⁷ Rü dücax, wüxi i naãne i pucü nagu nguxü rü meãma nanetü nawa nayae tümacèx ya yixema nagu üanexê, rü Tupanaarü ngüxêêgagu nixĩ i ngema.

⁸ Natürü ngëxguma ngëma naãne rü tuxu rü natüanegü i chixexü nawa yaegu, rü Tupana rü tá chixexü namaã naxuegu rü üxüwa tá nigu i guxüma i nawa yaexü. Rü ngëxgumarüü tá tixĩ ya yixema Cristuxü ítáxe.

Ítananguxêê na nayauxgüxü i maxü i taguma gúxü rü ngëmacèx tama nüxü tarüxoe na yaxögüxü

⁹ Natürü, Pa Chaueneëgü ya Pexü Tangechaügüxe, rü woo ngëmaãcü pemaã tidexagügu, natürü aixcüma nüxü tacuèx na tama ngëma duüxügü i nüxü rüxoexürüü pixĩgüxü. Erü pema rü pexü nangëxma i maxü i taguma gúxü, rü Tupana rü tá aixcüma poraãcü pexü narüngüxêê na naxcèx pemaxëxücèx.

¹⁰ Erü nüma ya Tupana rü aixcümacü nixĩ. Rü nüma rü tãütáma nüxü inayarüngüma ga yema mexü ga pexüxü rü ñuxácü taeneëgü i yaxögüxüxü na pengechaügüxü ga yexguma nüxü perüngüxêêgügu, ngëma ñuxma ípenaxüxürütama.

¹¹ Rü ñuxma rü tanaxwèxe i wüxichigü i pema rü ngëmaãcü noxrirüü mexü i perü ngúchaümaã nüxü perüngüxêêgüecha i taeneëgü ñuxmatáta wena núma naxü ya Cristu. Rü tanaxwèxe na ngëmaãcü pemaxëxü na düxwa

aixcüma Cristuxütawa pengugüxü ngëma ípenanguxëëxürüü.

¹² Rû tama tanaxwëxe na nüxü perüxoetanücüüxü na Cristuwe perüxixü. Natürü tanaxwëxe i naxrüü pixígü i ngëma duüxügü i guxüguma meã yaxögüäcüma Cristuwe rüxiãmaxü rü nayauxgüxü i guxüma i ngëma mexügü ga Tupana namaã ixunetaxü.

¹³ Rû dücax, yexguma tórü oxi ga Abráümaã inaxunetagu ga Tupana rü nügüégagutama inaxuneta, yerü tataxuma ga texé ga norü yexera ixixë na tümaegagu inaxunetaxüçèx.

¹⁴ Rû yemacèx ga Tupana rü Abráüxü ñanagürü: “Rü aixcümaxüchi tá poraãcü cuxü charüngüxëë. Rû tá cuxü nangëxma i muxüchixütama i cutaagü”, ñanagürü.

¹⁵ Rû Abráü rü meãma ínananguxëë ga guma nane ga Tupana namaã ixunetacü. Rû yemacèx nabu ga guma nane ga Ichaá ga Tupana namaã nüxü ixücü.

¹⁶ Rû ngëxguma duüxügü tacücèx ixunetagügu, rü to i norü yexera ixixüëgagu inaxunetagü. Rû wüxicana tacücèx ngëmaãcü inaxunetagügu, rü nüxü tacuèx rü aixcüma tá nanaxügü i ngëma naxcèx inaxunetagüxü, rü marü taxucürüwama yeüürü nachiga nidexagüecha.

¹⁷ Rû yemacèx ga Tupana rü yexguma inaxunetagu namaã ga yema duüxügü ga nayauxgüxü tá ga yema ngüxëë ga Tupana nüxna äxchaüxü, rü nügüégagutama inaxuneta, yerü nanaxwëxe na meãma nüxü nacuèxgüxü na aixcüma tá yangüxëëãxü rü tagutáma naxüchicüüãxü ga yema

namaã inaxunetaxũ.

¹⁸ Rũ nüxũ tacuèx rũ ngëxguma tacücèx nügüégagu inaxunetagu ya Tupana, rũ taxucürüwama tüxũ nawomüxëẽ rũ nanaxüchicüü i ngëma. Rũ ñuxma i guxãma i yixema na Tupanacèx ibuxmüxũ na tüxũ nangüxëèxücèx rũ tüxũ namaxëxëèxücèx, rũ nüma ya Tupana rũ nügüégagu tamaã inaxuneta na ngëmaãcü tá tüxũ nangüxëèxũ. Rũ ngëmaãcü tüxũ nanangúchaüxëẽ rũ tüxũ narüngüxëẽ na nüxũ icuáxücèx na aixcüma tá nayauxgüxũ i ngëma maxũ i taguma gúxũ i tamaã inaxunetaxũ.

¹⁹ Rũ ñuxma na ínangüxëèxũ na aixcüma tá nayaxuxũ i ngëma maxũ i taguma gúxũ, rũ taxucèxma taxoegaãëgü, erü nüxũ tacuèx na aixcüma daxügüxũ i naãnewa i Tupana íngëxmaxüwa tá ingügüxũ.

²⁰ Rũ ngëma nangëxma ya Ngechuchu i ñuxma yerü nüxĩra yexma naxücu na Tupanapëxewa taétüwa nachogüxücèx. Rũ ngëmaãcü guxüguma tórü ngüxëèruü i paigüeru nixĩ, guma Melquisedé ga Tupanapëxewa Abráüetüwa chogücürüü.

7

Ngechuchu rũ guma nuxcümaücü ga pai ga Melquisedérüütama nixĩ

¹ Rũ guma Melquisedé rũ ñãne ga Charéüãrũ ãëxgacü nixĩ ga yexguma namaüxgu ga Abráü. Rũ nüma ga Melquisedé, rũ duüxügüaruü pai nixĩ ga Tupanapëxewa. Rũ yexguma Abráü rũ to ga nachüüãneãrũ ãëxgacügümaã nügü nadaixgu rũ nüxũ nayexeragu, rũ Melquisedé rũ namawa

Abráüpëxegu nayangu ga yexguma Abráü nap-
atacèx taegugu. Rù nüma ga Melquisedé rù Tu-
panaégagu Abráümaã mexü naxuegu.

² Rù Abráü rù nüxü nayexma ga guxüma ga
yemaxügu ga yema äëxgacügu ga namaã nügu
nadëixüna napuxüxü. Rù yemawa ínanaxüxüchi
ga yema Tupanana üxü, rù Melquisedéna nanaxã.
Rù ngëma naëga i Melquisedé rù Äëxgacü ya Ix-
aixcümacü ñaxüchiga nixí. Rù norü ñane ga Charéü
rù Taäëxëëruü ñaxüchiga nixí. Rù ngëmacèx i
naëga i Melquisedé rù Äëxgacü ya Taäëxëëruü
ñaxüchiga ta nixí.

³ Rù Tupanaärü ore ga nuxcüma ümatüxüwa rù
tama nüxü nixu na texé tíxü ga nanatü rù naë
rù norü oxigü ga Melquisedé. Rù ngëxgumarüü
ta tama nüxü nixu i norü buxchiga rù norü
yuxchiga. Rù ngëmacèx Tupana Nanerüü
guxüguma duüxügüarü ngüxëëruü ya pai nixí
i Tupanapëxewa.

⁴ Rù ñuxma rù name nixí i nagu perüxĩnüë
na ñuxäcü aixcüma äëxgacü ya tacü yíixü ga
Melquisedé. Yerü nuxcümaücü ga tórü oxí ga
Abráü rù Melquisedéna nanaxã ga yema Tu-
panana üxü ga natanüwa ga yema yemaxügu ga
togü ga äëxgacügüna napuxüxü. Rù ngëmawa nüxü
tacuèx na Tupanapëxewa tórü oxí ga Abráüärü
yexeracü yíixü ga Melquisedé.

⁵ Rù ñuxma i Yudíugü, rù guxüma i norü
ngëmaxüwa ínanaxüxüchigü i ngëma Tupanana
üxü, rù ñuxüchi norü paigüna nanaxã yerü
yemaäcü nixí ga namuãxü ga yema mugü ga
Moiché ümatüxü. Natürü guxüma i ngëma paigü

rü Lebítaagü nixĩgü. Rü nüma ga Lebí rü guxüma i Yudíugürüü Abráútaa nixĩ. Rü ngēmaãcü i ngēma Yudíugü rü norü paigüna nanaxã i ngēma Tupanana üxü, woo natanüxügü i Yudíugü na yĩxü i ngēma paigü.

⁶ Natürü ga Melquisedé rü woo tama Lebítaa nixĩ, natürü Abráúmēxēwa nanayaxu ga yema Tupanana üxü. Rü nüxü tacuèx na Abráú yĩxü ga noxri nayaxucü ga Tupanaärü uneta. Rü Melquisedé rü Tupanana naca na Abráúmaã mexü naxueguxücèx.

⁷ Rü guxãma meãma nüxü tacuèx rü ngēxguma texé toguècèx Tupanana caxgu na tüxü nangüxēxücèx, rü Tupanapēxewa rü yíxema nüxna çaxe rü ngēma togü i naxcèx itaçaxüärü yexera tixĩ. Rü ngēmaãcü nüxü tacuèx na Abráúärü yexera yĩxü ga Melquisedé i Tupanapēxewa.

⁸ Rü ñuxma i nuã tatanüwa rü ngēma paigü i ngĩxü yauxgüxü i ngēma dīeru i Tupanana ücü, rü duüxügümare nixĩgü rü tá nayue. Natürü ngēxguma Melquisedéchiga yadexagu i Tupanaärü ore, rü ñoma namaxüxürüü nixĩ i nachiga yadexaxü. Rü ngēmawa nüxü tacuèx na Cristu ya guxüguma maxücürüü na yĩxü ga Melquisedé.

⁹⁻¹⁰ Rü Abráútaa ga Lebí, rü guxüma i paigü i Lebítaagü ixĩgüxü i ñuxma ngĩxü yauxgüxü i ngēma dīeru i Tupanana ücü, rü nümagü rü ta Abráúmaã Melquisedéna nanaxägü ga yema Tupanana üxü. Yerü nüma ga Lebí rü guxüma ga nataagü i ñuxma Yudíugüarü paigü ixĩgüxü, rü woo ga na tauta nabuexü ga yexguma, natürü marü Abráúxünewa nayexmagü ga yexguma

Melquisedé namawa Abráüpêxegu yanguxgu. Rü ngēmawa nüxü tacuèx na guxüma i ngēma paigüarü yexera yiixü ya Melquisedé.

¹¹ Rü nuxcümaügüxü ga tórü oxigü ga Yudíugü, rü Lebítaagü ga paigümêxêwa nixî ga nayauxgüãxü ga Tupanaârü mugü. Natürü pemaã nüxü chixu rü yexguma chi yema paigü aixcüma yema Yudíugüxü imexêëgügu ga Tupanapêxewa, rü taxucèx chima Tupana nüxü naxuneta ga naî ga pai ga Melquisedérüü ixïcü ga tama Lebítaa ga Arãürüü ixïcü. Rü yemacèx ga Tupana rü nüxü naxuneta ga Nane ga Ngechuchu na tórü chogüruü ya pai yiixücèx.

¹² Rü yemacèx ga Tupana rü yema Yudíugüarü paigüchicüüxü nayangucuchixêë ga Cristu. Rü nüma nixî i ñuxma i aixcüma Tupanapêxewa tüxü yamexêëgüxü. Rü guxüma ga Lebítaa rü paigü nixîgü yerü yemaãcü nixî ga naxueguxü nawa ga yema mugü ga Moïché ümatüxü. Natürü nüma ga Cristu rü marü nanaxüchicüü ga guxüma ga yema.

¹³⁻¹⁴ Erü meãma nüxü tacuèx rü nüma ya tórü Cori ya Ngechuchu ya yima nachiga idexagücü rü tama Lebítaa nixî erü nüma rü Yudátaa nixî. Rü nüxü tacuèx rü taxuüma ga Yudátaa rü pai nixî, yerü ga Moïché rü yexguma yema paigüchiga yadeaxgu rü taxuüma ga Yudátaaxü naxuneta na pai yiixücèx.

¹⁵ Rü ngēmaãcü meã nangox na Tupana iyanax-oxêëxü ga guxüma ga yema mugü ga Moïché ümatüxü ga paigüchiga. Yerü nüma ga Tupana rü nüxü naxuneta ga wüxi ga pai ga yexwacaxücü ga tama Lebítaa ixïcü. Rü nüma nixî i tórü Cori yiixü ya Melquisedérüü ixïcü, erü guxüma i ngēma togü

i paigüarü yexera nixĩ.

¹⁶ Rũ guxũma ga yema togũ ga paigũ rũ nangucu yerũ Lebítaa nixĩgũ. Natürũ nũma ga Cristu rũ paixũ ningucuchi yerũ poramaã yuwa Ínarũda rũ guxũguma namaxẽcha na tũxũ nangũxẽxũcèx.

¹⁷ Rũ ngẽmacèx i Tupanaãrũ ore i ümatũxũwa rũ tórũ Corichiga ñanagürũ:

“Cuma rũ guxũgutáma duũxũgüarũ ngũxẽẽruũ ya pai quixĩ Melquisedérũ”,
ñanagürũ.

¹⁸⁻¹⁹ Rũ yemacèx ga Tupana rũ ñoma ga naãnewa nanamu ga Nane, yerũ yema mugũ ga paigũchiga naxũmatũxũ ga Moíché rũ tama poraãcũ tũxũ narũngũxẽẽ yerũ tama aixcũma tũxũ nimexẽẽgũ ga Tupanapẽxewa. Rũ yemacèx Nanexũ namu ga Tupana na tórũ pecaducèx nayuxũcèx na ngẽmaãcũ tũxũ nangẽxmaxũcèx i maxũ i taguma gũxũ rũ aixcũma Tupanamücũgũ ixĩgũxũcèx.

²⁰⁻²¹ Rũ yexguma Tupana yema togũ ga paigũxũ ngucuxẽẽgu, rũ nanangucuxẽẽmare. Natürũ yexguma Cristuxũ yangucuchixẽẽgu na tórũ ngũxẽẽruũ ya pai yĩxũcèx, rũ nũgüégagutama inaxuneta. Rũ yemacèx ga yexguma Cristuxũ yangucuchixẽẽgu rũ ñanagürũ:

“Choma i Cori ya Tupana rũ marũ cuxũ chaxuneta na guxũgutáma duũxũgüarũ ngũxẽẽruũ ya pai quiixũcèx. Rũ ngẽma rũ tagutáma chanaxũchicũü erũ chaugüégagu ichaxuneta”,
ñanagürũ.

²² Rũ ñũxma na yemaãcũ nũgüégagutama inaxunetaxũ ga Tupana, rũ nũxũ tacuèx na aixcũmaxũchima yema paigüarũ yexera na yĩxũ

ya Cristu erü guxüğutáma Tupanapëxewa tüxü narüngüxêê.

²³ Rû yema togü ga paigü rû namuxüchi, yerü niyuetanü. Rû yemacèx taxucürüwama guxüğuma paigü nixîgü.

²⁴ Natürü ñuxma na tórü ngüxêêruü ya paixü yangucuchixü ya Ngechuchu, rû ngêmacèx marü taxucèxma texé ya togue tingucuchi, erü nüma ya Ngechuchu rû tagutáma nayu.

²⁵ Rû ngêmacèx nixî i ñuxma i nüxü natauxchaxü na aixcüma tüxü namaxêxêxü ya guxãma ya yíxema norü ngüxêêmaã Tupanaxütawa ngugüxe. Erü nüma ya Ngechuchu rû guxüğuma namaxêcha na tumaetüwa nachogüxücèx.

²⁶ Rû ngêmaäcü ya Ngechuchu, rû nüxîcatama nixî i pai ya tórü ngüxêêruü yîxü i Tupanapëxewa. Erü nüma rû aixcüma naxüüne, rû nataxuma i chixexü i nawa, rû nangearü pecaduãx yerü taguma taxrüü pecadu naxü. Rû ñuxma rû guxüetüwa nangêxma i daxüguxü i naãnewa i Tupana íngêxmaxüwa.

²⁷ Rû Ngechuchu rû tama ngêma togü i paigüerurüü nixî. Erü nümagü rû nanaxwèxe na guxü i ngunexügu Tupanacèx naxünagü nadèixü na ngêmaäcü Tupana nüxü nüxü ngechaüxücèx i noxrütama pecadugü rû guxü i duüxügüarü pecadugü ta. Natürü nüma ga Ngechuchu rû yexguma nügü inaxãxgu, rû wüxicanatama pecaducèx nayu. Rû ngêma rû guxüğutama name i Tupanapëxewa.

²⁸ Rû yema mugü ga Moïché ümatüxü, rû duüxügümarexü naxuneta na paigüerugü yixîgüxücèx. Natürü nümagü rû ta nipecaduãxgü.

Natürü yemawena ga Tupana rü nügüéagagu Nanexü naxuneta na tórü ngüxēeruü yīxüçèx. Rü yima Nane rü guxüguma mecüxüchi ya tórü Maxēxēeruü nixī. Rü nüma rü guxüguma tüxü narüngüxēē i Tupanapēxewa.

8

Ngechuchu nixī ya tórü ngüxēeruü i Tupanapēxewa

¹ Rü ngēma pemaã nüxü tixuxchaüxü i ñuxma nixī na tüxü nangēxmaxü ya tórü ngüxēeruü ya mexēchicü i Tupanaxütawa. Rü nüma rü Tupana Nane ya Cristu nixī. Rü daxüguxü i nañewa i Tupanaärü tügüncüwawa narüto erü guxüärü äëxgacü nixī.

² Rü ngēma daxüguxü i nañewa i ngēma nachica i üünexü ga Tupana üxüwa nixī i taxcèx ínaçaxü. Rü tama ngēma Yudíugüarü paigürüü wüxi ya İpata ya duüxügü üxünewa Tupanana taxcèx ínaca.

³ Rü guxüma i ngēma Yudíugüarü paigüeru rü nangucu na Tupanana naxãgüãxüçèx i ãmaregü rü naxcèx nadaiãxüçèx i naxünagü na Tupana nüxü nüxü ngechaüxüçèx i duüxügüarü pecadugü. Rü yemacèx ga Ngechuchu rü Tupanana nügü naxãmare na duüxügüarü pecaducèx nayuxüçèx.

⁴ Rü ñuxma i nüma ya Ngechuchu rü daxüguxü i nañewa nangēxma na ngēma tórü ngüxēeruü ya pai yīxüçèx i Tupanapēxewa. Rü ngēmacèx tama ñoma i nañewa nixī i pai yīxü. Natürü ngēxguma chi ñoma i nañewa nangēxmagu rü tãü chima pai nixī erü ñoma i nañewa nangēxmagü i

ngẽma Yudíugüarü paigü i Tupanana ãmare ägüxü yema Moïchéarü mugü nüxü ixuxürüü.

⁵ Natürü ngẽma puracü i ñoma i naãnewa naxügüxü i ngẽma Yudíugüarü paigü, rü naxcèx nadauxütaegümare i ngẽma Ngechuchu daxüguxü i naãnewa üxü. Rü ngẽma nachica i nawa Tupanacèx napuracüexü i ngẽma paigü, rü nanaxüchicünèxägümare i ngẽma nachica i Ngechuchu nawa ngëxmaxü. Rü meãma nüxü tacuèx i ngẽma, yerü yexguma Moïché naxüchaügu ga Tupanapata, rü Tupana rü ñanagürü nüxü:

“¡Düçèx, meã nangugü i ngẽma cuèxruü ga cuxü chawéxü ga mèxpüne ga Chinaïwa! Rü chanaxwèxe i ngẽmaäcü na cunaxüxü”,
ñanagürü.

⁶ Natürü nüma ya tórü ngüxëëruü ya Cristu rü daxüguxü i naãnewa nangëxma, rü ngẽma aixcümaxüchi Tupanapëxewa taétüwa nachogü. Rü ngẽma Yudíugüarü paigü rü nagu naxïãma ga yema nuxcümaüxü ga uneta ga Moïché ümatüxü. Natürü nüma ya Tupana rü marü tüxna nanaxã i wüxi i ngexwacaxüxü i uneta erü tamaã nüxü nixu na Cristu yïixü ya aixcüma tórü ngüxëëruü ixïcü. Rü nüma rü nayu na Tupanapëxewa tüxü yamexëëxüçèx, rü ngẽma Tupanaxütawa nangëxma i ñüxma na taétüwa nachogüxüçèx. Rü ngẽmaäcü nüxü tadau na Tupanaãrü uneta i ngexwacaxüxü rü yema nuxcümaüxü ga unetaarü yexera yïixü na namexü.

⁷ Yerü yexguma chi yema nüxïraüxü ga uneta ga Moïché ümatüxü rü aixcüma namexgu na

duïxügüxü namaxêxêxücèx, rü marü taxucèx chima tanaxwèxe i to i ngexwacaxüxü i Tupanaãrü uneta.

⁸ Natürü nüma ga Tupana rü nüxü nadau na tama aixcüma napêxewa duïxügüxü yamexêxü ga yema nüxïraüxü ga uneta ga Moïchéna naxãxü. Rü yemacèx ga Tupana rü ñanagürü:

“Wüxi i ngunexü rü wena táxarü guxüma i chorü duïxügümaã ichaxuneta.

⁹ Natürü ngêma chorü uneta i ngexwacaxüxü, rü tãütáma namaã nawüxigu ga yema nüxïraüxü ga chorü uneta ga nuxcümaügüxü ga perü oxigümaã nüxü chixuxü ga yexguma nüxü charüngüxêegu na ínachoxüxücèx ga Equituarü naãnewa. Yerü nümagü ga yema duïxügü rü tama chauga naxïnúê rü tama nayanguxêê ga yema nüxïraüxü ga chorü uneta, rü yemacèx íchanawogü.

¹⁰ Natürü ngêxguma nawa nanguxgu na wena namaã ichaxunetaxü, rü ñaãcü tá nixï i guxüma i Yudíugümaã ichaxunetaxü: ‘Rü tá meãma ngêma duïxügüxü nüxü chacuèxêê i chorü mugü na aixcüma naãêwa nangêxmagüxücèx. Rü choma rü tá norü Tupana chixï, rü nümagü rü tá chorü duïxügü nixïgü’.

¹¹ Rü guxüma i ngêma duïxügü i choxü yaxôgüxü, rü aixcüma tá choxü nacuèxgü. Rü ngêmacèx taxucèxtáma tüxcüü nügümaã nüxü nixugügü i chauchiga na ngêmaãcü choxü nacuèxgüxücèx. Erü guxüma i chorü duïxügü rü aixcüma tá meã choxü nacuèxgü woo buxü rü êxna yaxü.

¹² Rü tá nüxü nüxü changechaü i norü chixexügü, rü tá nüxü ichayarüngümaxüchi i norü pecadugü”,

ñanagürü ga Tupana.

¹³ Rū dücax, ñuxma na Tupana ngexwacaxüxü i unetachiga idexaxü, rü ngēmawa nūxü tacuèx na yema nūxīraüxü ga uneta rü marü nangupetüchaüxü. Rū nūxü tacuèx rü guxüma i ngēma marü ngupetüchaüxü, rü paxa tá inayarüxo. Rū ngēmaäcü i ngēma Yudíugüarü paigü, rü marü inayarüxoxchaü na Tupanapëxewa duüxügüxü nangüxëxü. Erü nūma ya Tupana rü marü Cristuxü ningucuchixëe na tórü ngüxëeruü yiüxcèx i napëxewa.

9

Tupanapata ga duüxügü üxünechiga rü Tupanapata ya daxüguxü i nañewa ngëxmanechiga

¹ Rū yexguma nuxcüma Moïchémaã yadeaxgu rü nūxna naxããgu ga yema nūxīraüxü ga uneta, rü Tupana namaã nūxü nixu na ñuxãcü nanaxwèxexü na nūxü yacuèxüügüxü. Rū yexgumarüü ta namaã nūxü nixu na ñuxãcü nanaxwèxexü na naxcèx naxüãxü ga wüxi ga ĩpata ga naxchirunaxcèx na yéma nūxü yacuèxüügüxüxcèx ga paigü.

² Rū guma ĩpata ga naxchirunaxcèx rü nitüyemachĩã. Rū yema naxmachĩã ga nūxīra nawa ixücuxü, rü “Nachica i Üünexü” nixi ga naega. Rū yéma nayexma ga werachica rü mecha ga pãu ga üünexü nagu nuxü.

³ Rū yema to ga naxmachĩã ga yema tüyemachĩãxüxcèxwena üxü rü “Nachica i Üünexüchixü” nixi ga naega.

⁴ Rū yéma nayexma ga yema mecha ga uirunaxcèx ga ngextá nawa yagugüãxü ga

pumara ga yixixũ ga yexguma yaguxgu. Rũ yéma nayexma ta ga yema baú ga Tupanaãrũ mugũ nagu namaã nanguxũgũxũ. Rũ yema baú rũ guxũwama uirumaã natũxũne. Rũ yematama baúarũ aixepewa nayexma ga wũxi ga tũxũxãcũ ga uirunaxcèx ga yema pãũ ga daxũwa rüyixũmaã ããcuxũ. Rũ yexgumarũ ta yema baúarũ aixepewa nayexma ga Arãũãrũ caxũruũ ga rũxũxũne, rũ guma nutagũ ga Tupanaãrũ mugũ nagu umatũgũcũ.

⁵ Rũ yema baúétũwa nayexmagũ ga yema taxre ga daxũcũãxchicũnèxãgũ ga ixãxpèxatũxũ. Rũ naxpèxatũgũmaã nayadũxétũgũ ga yema baúãtaũ. Rũ yema daxũcũãxchicũnèxãgũarũ ngãxũwa nixĩ ga nũgũ nangoxèẽxũxũ ga Tupana. Natũrũ taxucèxma tũxcũũ yexeraãcũ nũxũ tixu i ngèmachiga.

⁶ Rũ wũxicana yemaãcũ na namexèẽgũãxũ ga guxũma ga yema, rũ ñuxũchi ga paigũ rũ guxũguma yema nũxĩraũxũ ga naxmachĩãgu nachocuxũ na yéma Tupana namaã nũxũ ixuxũãcũma nũxũ yacuèxũũgũxũcèx.

⁷ Natũrũ yema to ga naxmachĩãwa rũ yema paigũarũ ãẽxgacũxicatama nixĩ ga yexma ucuxũ. Rũ tama guxũguma yexma naxũcu, natũrũ wũxicanatama yexma naxũcu ga wũxichigũ ga tauncũgu. Rũ yexguma yexma naxũcuxgu rũ yéma nanange ga naxũnagũ rũ guma nagũmaã yema baúxũ namaxcuétũ. Rũ yemaãcũ ga yema paigũarũ ãẽxgacũ rũ inanaxã ga guma nagũ na noxrũtama pecadu rũ guxũma ga duũxũgũarũ pecaduxũ iyanangũmaxũcèx ga Tupana.

⁸ Natũrũ yema paigũarũ ãẽxgacũxicatama nixĩ

ga yema Nachica ga Üünexüchixügu ücuxü ga Tupana íyexmaxüwa. Rü ngẽmaãcü Tupanaãe i Üünexü tüxü nüxü nacuèxẽẽ na taxucürüwama yexma Tupana íyexmaxügu nachocuxü ga guxüma ga duüxügü yerü yexguma nagu naxixgu ga yema mugü ga Moïché ümatüxü rü nachuxu ga yema.

⁹ Rü guxüma i ngẽma pemaã nüxü chixuchi-gaxü, rü wüxi i cuèxruü nixĩ i taxcèx i yixema na ñuxma imaxëxü. Rü ngẽmawa nüxü tadau rü yema ãmaregü ga Tupanana naxägüxü rü yema naxünagü ga Tupanacèx nadèixü rü taxucürüwama yema duüxügüxü nimexẽẽ na aixcüma Tupanapëxewa yamexüçèx.

¹⁰ Rü yema nuxcümaügüxü ga mugü ga õnagüchiga rü axeügüchiga rü nacümagüchiga ixixü, rü yema duüxügüarü düxétüxü necèxicatama nixĩgü. Rü yemacèx tama yema duüxügüxü nimexẽẽ na aixcüma Tupanapëxewa yamexüçèx. Rü woo napora ga yema mugü ga noxrix, natürü yexguma ínanguxgu ga Cristu rü marü yexma nayacuèx na duüxügümaã naporaxü.

¹¹ Natürü i ñuxma rü marü ínangu ya Cristu. Rü nüma nixĩ i aixcüma tórü ngüxèëruü yiixü i Tupanapëxewa, rü nagagu nixĩ i nangëxmaxü i maxü i taguma gúxü. Rü ngẽma nachica i ngextá taétüwa ínachogüxüwa rü aixcüma naxüüne erü tama guma ïpata ga naxchirunaxcèx ga duüxügümare üxünerüü nixĩ erü daxügüxü i naãnewa nangëxma.

¹² Rü Cristu rü marü daxügüxü i naãnegu naxücu i ngextá Tupana íngëxmaxüwa. Rü taxucèxma tüxcüü wüxichigü ya taunecügu ngëxma naxücu, erü marü guxüguma ngema nangëxmaëcha.

Rü yexguma yexma naxücuxgu, rü tama yéma nanange ga chibugügü rü wocaxacügügü na Tupanana naxãaxücèx. Natürü nüma ga Cristu rü nagütama inaxã na yemaãcü naxütanüãxücèx ga tórü pecadugü rü tüxũ nangèxmaxücèx i maxũ i taguma gúxũ.

¹³ Rü yema mugü ga Moïché ümatüxũ rü ñanagürü:

“Ngèxguma texé yuetaxũ ingögügu, rü taxucürüwama Tupanapata ya naxchirunaxcèxgu taxücu”,

ñanagürü. Rü yemacèx ga yema Yudíugü, rü yexguma wüxi ga yuetaxũ yangögügügu rü nanaxwèxegü ga na norü paixütawa nagaãxũ ga wüxi ga woca na yema pai Tupanacèx yamáxücèx rü na yaguãxücèx na yemaãcü ga guma tanimaca rü dexágu nagüãxücèx na yema duüxügüxũ namaã namaxcuxücèx na yemaãcü nüxna ínayixücèx ga norü chixexũ. Natürü yema rü duüxügüarü düxétüxũnewaxicatama nanamexẽ rü tama norü maxũxũ namexẽẽ.

¹⁴ Natürü nagü ya Cristu rü yema naxünagügüarü yexera name erü tórü maxũ namexẽẽ na aixcüma Tupanapèxewa imexücèx. Rü Cristu rü woo Tupana Nane na yĩxũ rü na nataxuxũ ga norü chixexũ, natürü Tupanana nügü naxã rü tórü pecaducèx nayu yerü Naãẽ i Üünexũ nanapoxẽẽ. Rü yemaãcü curuchagu nanabaxẽẽ ga nagü. Rü ñuxma ya yima nagü rü ningu na tüxũ namexẽẽxücèx i Tupanapèxewa. Rü ngèmacèx taxucèxma tanaxwèxe na nagu ixĩxũ ga yema mugü ga Moïché ümatüxũ ga tama tüxna naxãxũ i maxũ i taguma gúxũ. Rü ñuxma na Cristugagu

Tupanapëxewa imexũ, rü nüma ya Cristu rü tüxũ narüngüxêẽ na naxüxcèx i ngẽma Tupana ya maxücü tüxũ naxwèxexũ.

15 Rü ñuxma na tórü pecaducèx nayuxũ ga Ngechuchu ya Cristu, rü nüma nixĩ i tórü ngüxêeruũ i Tupanapëxewa, ngẽma Tupanaârü uneta i ngexwacaxũxũ nüxũ ixuxürüũ. Rü ñuxma i yixema na Tupana tüxũ dexũ, rü tüxũ nangëxma i maxũ i taguma gúxũ ega yima Naneãxũ yaxôgügu. Rü ngëxgumarüũ ta i guxüma i Tupanaârü duüxügü ga nuxcüma yaxôgüxũ, rü nüxũ nangëxma i maxũ i taguma gúxũ yerü Cristu nayu na norü pecaduna Ínanguxüxêẽãxücèx.

16 Rü ngëxguma nayuxchaũgu i wüxi i duüxũ, rü wüxi i poperagu nanaxümatü na texé tá nayaxuxũ i norü ngëmaxügü. Natürü ngëxguma namaũxgu i ngẽma duüxũ, rü taxucürüwama texé tanayaxu i norü ngëmaxügü.

17 Rü ngëmacèx i ngẽma popera rü tama napora i ngëxguma namaũxgu i ngẽma duüxũ. Rü ngëxguma nayuxgucicatama nixĩ i naporaxũ.

18 Rü nüma ga Cristu rü norü yumaã nixĩ ga Tupanapëxewa tüxũ yamexêëgüxũ. Yerü ga Moïché rü nüxũ nixu rü yexguma texé pecaduãxgu rü tanaxwèxe na tümaârü paixütawa tanagaxũ ga wüxi ga naxüna na tümaegagu nayuxêẽãxücèx rü inabaãxücèx ga nagü na Tupana tüxũ nüxũ ngechaüxücèx ga tümaârü pecadu.

19 Rü Moïché rü guxüma ga duüxügüpëxewa nüxũ nixu ga guxüma ga Tupanaârü mugü. Rü yemawena nanayaxu ga wocaxacügügü rü chibuxacügügü, rü dexámaã nanaxüéũ. Rü ñuxüchi nanayaxu ga wüxi ga naïxchacüüxacü

rü ñuxre ga tüèxmü ga dauxñe, rü yema naïxchacüügu nanabagümü. Rü yemamaã guma nagüwa nanacúe rü ñuxñchi nanamaxcuétü ga yema popera ga Tupanaärü mugü nawa yexmaxü. Rü yexgumarüü ta nayamaxcutanü ga guxñma ga duñxügü.

²⁰ Rü ñuxñchi ga Moïché rü ñanagürü nüxñ ga duñxügü:

“Tupana rü marü inaxuneta na pexñ tá nangñxëñxñ. Rü daa nagümaã pexñ chimaxcutanü i ñuxma erü ngëmaãcü nixñ i choxñ namuxñ na ngëmawa nüxñ pecuáxñcèx na aixcüma tá pexñ nangñxëñxñ”,

ñanagürü.

²¹ Rü ñuxñchi ga Moïché rü guma nagümaã nanamaxcuétü ga guma ñpata ga naxchirunaxcèx ga nawa Tupanaxñ yacuèxüügüne. Rü yexgumarüü ta nayamaxcutanü ga guxñma ga yemaxñgü ga namaã Tupanaxñ yacuèxüügüxñ ga guma ñpataarü aixepewa yexmagüxñ.

²² Rü nüxñ tacuèx rü yema duñxügü ga yexguma pecadu naxügügu rü Tupanapëxewa nügü yamexëëgüchañgu, rü norü paigüxñtawa nanaga ga wüxi ga naxñna na nüxñ yamáaxñcèx rü inabagüxëñxñcèx na Tupana tama napoxcuexñcèx. Natürü ñuxma ya Tupana rü tüxñ nüxñ nangechañ i tórü chixexñ yerü tórü pecaducèx nayu ga Ngechuchu rü nagü inanaba. Rü yexguma chi tãñ chima nayuxgu rü nagü inabañgu, rü taxucürüwa chima Tupana tüxñ nüxñ nangechañ i tórü pecadugü.

Cristu rü nayu na iyanaxoxëãxücèx i pecadu

²³ Rü yemacèx ga Tupana rü nuxcümamaxüchima Moïchémaã nüxü nixu na paigü duüxügüarü pecaducèx nadëixü ga naxünagü rü inabaãxü ga nagü na yemaãcü Tupana tama napoxcuexücèx ga duüxügü. Natürü i ñuxma i yixema na Tupana tüxü dexü, rü tüxü nangëxma i tachica i daxüguxü i naãnewa yerü Nane ya Cristutama tórü pecaducèx nayu rü inanaba ga nagü. Rü yima nagü rü Tupanapëxewa rü poraãcü ngëma naxünagügüarü yexera narüporamaë.

²⁴ Rü ngëmacèx i ñuxma rü taxucèxma tüxcüü guma ïpata ga naxchirunaxcèx ga duüxügü üxünegu naxücu ya Cristu na ngëma taétüwa nachogüxücèx. Erü nüma ya Cristu rü marü Tupanaxütawaxüchi nangu i daxüguxü i naãnewa. Rü ngëma Nanatüpëxewa nangëxma i ñuxma na ngëma taétüwa nachogüxücèx.

²⁵ Rü ngëmacèx i ñuxma rü taxucèxma tüxcüü guxüguma Nanatüna nügü naxãëcha na ngëmaãcü taxcèx nayuuuxücèx. Rü yema Yudügüarü paigüarü ãëxgacügü rü gúcü ga taunecügügu guma ïpata ga üünenegu nachocuxü na yéma Tupanana naxãgüãxücèx ga guma naxünagügü.

²⁶ Natürü ya Cristu, rü taxucèxma tüxcüü gúcü ya taunecügügu Tupanana nügü naxãëcha, erü ngëxguma chi ngëmaãcü yixïgu rü chi noxri naãne ixügügumama rü chi marü muëxpüxcüna taxcèx nayu. Natürü ñomaücüü ga Cristu rü marü ñoma ga naãnewa nangu na wüxicanatama nügü inaxãxücèx rü pecaducèx nayuxücèx.

²⁷⁻²⁸ Rü ngëma na wüxicanatama nayuxü i duüxügü naxüpa na Tupanapëxewa nangugüxü,

rü yexgumarüütama ga Cristu rü wüxicanatama nügü inaxã rü nayu na iyanaxoxêẽãxücèx i muxüma i duüxügüarü pecadugü. Natürü wena taxarü núma naxü. Rü ngêxguma wena núma naxüxgu rü tama pecaduarü oxêẽwa tá núma naxü. Natürü tá núma naxü na namaxêxêẽãxücèx i guxüma i ngêma duüxügü i aixcüma Ínanguxêẽgüxü.

10

¹ Rü yema mugü ga Moïché ümatüxü rü írarüwatama yema duüxügücèx nanangoxêẽ ga tacü tá na naxüxü ga Cristu. Natürü ga yema mugü rü tama aixcüma Cristurüü napora, yerü taxucürüwama Tupanapêxewa nayamexêẽ ga yema duüxügü woo gúcü ga taunecügügu Tupanacèx nanadaixü ga naxümagü na yemaãcü Tupanana nangaicamagüxücèx. Rü yemaãcü ga yema mugü rü taxucürüwama Cristurüü nanamaxêxêẽ ga yema duüxügü.

² Rü yexguma chi yema mugü aixcüma yema duüxügüxü imexêẽgu ga Tupanapêxewa, rü tãü chima nagu narüxînüêẽcha na yapeduãxü, rü chi nüxü narüxoe na naxümagü Tupanacèx nadèixü.

³ Natürü woo gúcü ga taunecügügu Tupanacèx naxümagü nadèixü ga duüxügü, rü tama norü pecadu inayarüxoxêẽ. Rü yema rü norü pecaduarü cuèxãchixêẽruümare nixü.

⁴ Yerü guma nagü ga yema wocagü rü chibugü rü tama napora na iyanaxoxêẽãxücèx ga pecadugü.

⁵ Rû yemacèx ga Cristu ga yexguma ñoma ga naãnewa naxûxchaũgu, rû Nanatûxũ ñanagürü:

“Tama cunaxwèxe na naxûnagü cuxcèx nadèixũ i duũxũgü na naxûtanügüãxücèx i norü pecadugü. Natürü cunamexêê i ñaã chaxune na ngēmamaã chanaxûtanûxücèx i pecadu.

⁶ Rû tama namaã cutaã i ngēma naxûnagü i cuxna naxâmaregüxũ rû cuxcèx nadèixũ rû yagugüxũ na naxûtanügüãxücèx i norü pecadugü.

⁷ Rû yemacèx rû ñacharügü: ‘Dücèx, Pa Chau-natûx, daxe chixĩ, rû nuã cupèxewa changèxma na chanaxûxücèx i curü ngúchaũ rû na chayuxücèx, ngēma curü orewa chauchiga naxûmatûxûrũ’, ñacharügü”.

⁸ Rû yemaãcü ga Cristu rû nüxũ nixu na Tupana rû tama aixcüma namaã nataãxũ ga yema na naxcèx nadaiãxũ ga naxûnagü rû naxcèx yagugüãxũ na naxûtanügüãxücèx ga norü pecadugü woo yema mugü ga Moïché ûmatûxûwa rû duũxũgüxũ namu na naxügüãxũ ga guxũma ga yema.

⁹ Rû yemawena ga Cristu, rû ñanagürü ta:

“Dücèx, Pa Chaunatûx, daxe chixĩ, rû nuã cupèxewa changèxma na chanaxûxücèx i curü ngúchaũ rû duũxũgüarü pecaducèx na chayuxücèx”,

ñanagürü. Rû yemawa nüxũ tacuèx na Tupana rû marü iyanaxoxêêãxũ na naxûnagü naxcèx nadèixũ, yerü Nanexũ ningucuchixêê na pecaducèx nayuxũ.

¹⁰ Rû ñuxma na Ngechuchu ya Cristu naxûxũ ga yema Tupanaarü ngúchaũ, rû ngēmacèx nixĩ i ñuxma i Tupanapèxewa ixüünexũ i yixema.

Yerü nüma ga Cristu rü Tupanana nügü naxã na wüxicanatama guxããrû pecaducèx nayuxü.

11 Rü guxüma i Yudíugüarü paigü rü wüxichigü i ngunexügu rü tupaucawa nangëxmagüxü na Tupanana naxãgüãxücèx i naxünagü i naxcèx nadai-iixü. Rü guxüguma yemaãcü nanaxügüxü natürü taguma aixcüma inayarüxo ga norü pecadugü woo yemaãcü na naxügüxüãxü.

12 Natürü nüma ga Ngechuchu ya Cristu rü wüxicanatama Tupanana nügü naxã na guxããrû pecaducèx nayuxücèx. Rü yemawena rü ñuxüchi daxüwa naxü rü Tupanaãrû tügüncüwawa nayarüto, erü guxããrû ãëxgacü nixi i ñuxmax.

13 Rü ngema nixi i nangëxmaxü ñuxmatáta ya Tupana rü guxüma i norü uwanügüxü nüxü nayexeraxëë.

14 Rü nüma ga Ngechuchu ya Cristu rü wüxicanatama Tupanana nügü naxã rü nayu na guxüguma Tupanapëxewa timexücèx ya yixema Tupanacèx tüxü yaxüünexëëgüxe. Rü ngëmacèx i ñuxma rü taxucèxma tüxcüü wena nügü inaxã rü nayu, yerü wüxicanatama guxüma ningutanüxëë.

15-16 Rü Tupanaãë i Üünexü rü tüxü nüxü nacuèxëë na aixcüma yiixü i ngëma, yerü nüma ga Tupana rü ñanagürü:

“Ngëxguma nawa nanguxgu na wena ngëma Yudíugümaã ichaxunetaxü, rü wüxi i ngexwacaxüxü i uneta tá nüxna chaxã. Rü tá meã ngëma duüxügüxü nüxü chacuèxëë i chorü mugü na aixcüma naãëwa nangëxmagüxücèx rü guxüguma naga naxñüëxücèx.

17 Rü tá nüxü ichayarüngümaxüchi i ngëma

duũxügüarü pecadugü rü ngēma chixexü i naxügüxũ. Rü tagutáma wena nüxna chacuèxãchi”, ñanagürü.

¹⁸ Rü ngēmaãcü nüxũ tacuèx rü ngēxguma Tupana duũxügüaxũ nüxũ ngechaũgu i norü pecadugü, rü marü taxucèxma tüxcüũ nanaxwèxe na wena tacü i naxünagü nüxna naxãgüxũ naxcèx i pecadu.

Name nixĩ i Tupanana tangaicamagü

¹⁹⁻²⁰ Rü ngēmacèx i ñuxma, Pa Chaueneëgü, rü taxucèxma tüxcüũ tamuũë na Tupana íngēxmaxüwa ichocuxü na namaãxüchi idexagüxüçèx. Rü nuxcümaxüchima rü paigüarü ãëxgacüxicatama yexma naxücu nagu ga guma ìpata ga naxchirunaxcèx ga Tupana nawa yexmane. Rü taxucürüwama ngexerüxüxemare yexma taxücu. Natürü nüma ga Ngechuchu ya Cristu rü marü inayanaxoxëë ga guxüma ga yema ga yexguma curuchagu nayuxgu rü nagü inabaãgu na Tupana íngēxmaxüwa tüxü yachocuxëëxüçèx rü namaãxüchi idexagüxüçèx. Rü woo taxucürüwama Tupanana tangaicamagü ga noxrix, natürü nüma ga Cristu rü nayu na tüxü namaxëëëxüçèx. Rü nagagu nixĩ i ñuxma i Tupanaxütawa ingügüxũ.

²¹ Rü nüma nixĩ i Tupanapëxewa tüxü nangüëëxü i guxãma i yixema i Tupanaãrü duũxügü ixĩgüxe.

²² Rü ñuxma na tüxü nangëxmaxü ya tórü ngüëëruũ i Tupanapëxewa, rü tanaxwèxe i ngearü chixexüãcüma Tupanana tangaicamagü na namaãxüchi idexagüxüçèx. Rü tanaxwèxe i aixcüma tayaxõgü na nüma rü tá meã tüxü

nayaxuxŭ yerü Cristu rü taxcèx nayu na tüxŭ iyanaxoxëëxŭcèx i tórü chixexŭ rü yemacèx marü naegagu ítabaiŭ.

²³ Rü tanaxwèxe i aixcüma meã Cristuaxŭ tayaxögüecha yerü nagümaã tüxŭ inayanaxoxëë ga tórü chixexŭ. Rü ngëmacèx ítananguxëë na wena taxarü núma naxŭxŭ na Nanatüxütawa tüxŭ nagagüxŭ. Rü taguma tanaxwèxe na nüxŭ rüxoexŭ na yaxögüxŭ, rü bai i írarüwa. Erü Tupana ga tamaã ixunetacü na tüxŭ nangüxëëxŭ, rü aixcümamaxŭchi tá nayanguxëë i guxŭma ga yema tamaã nüxŭ yaxuxŭ.

²⁴ Rü ñuxma na ngëmaãcü tüxŭ nangüxëëxŭ ya Tupana, rü name nixĩ i guxŭguma naxcèx tadaugü na ñuxãcü wüxichigü yigü rüngüxëëgüxŭ na yexeraãcü yigü ingechaŭgüxŭcèx rü mexŭ ixügüxŭcèx.

²⁵ Rü name nixĩ i guxŭguma tórü ngutaquëxegüwa na íngugüüxŭ. Erü nümaxŭ rü marü nüxŭ narüxoe na ngutaquëxewa naxŭxŭ, rü tama tanaxwèxe na ngëxgumarüŭ ixŭgüxŭ. Rü ngëmacèx name nixĩ i yigüaxŭ tanangúchaŭxëë na ingutaquëxegüxŭ. Rü ñuxma na nüxŭ icuáxŭ na marü yangaicaxŭ ya tórü Cori, rü yexeraãcü tanaxwèxe na yigüaxŭ nangúchaŭxëëxŭ.

²⁶ Natürü ngëxguma chi texé Cristuaxŭ yaxöchirëxgu ga noxrix rü ñuxŭchi noxtacüma nüxŭ tarüxoxgu, rü marü nataxuma na ñuxãcü namexëëxŭ i ngëma tümaärü pecadu i Tupanapëxewa.

²⁷ Erü ngëxguma chi ngëmaãcü noxtacüma Cristuxŭ tarüxoxgu, rü aixcümamaxŭchi tá tanayaxu i ngëma poxcu i äücümamaxŭ i Tupana tá tüxŭ namaã

poxcuxü rü yima üxü ya iyaurane ya nawa tá ínaguxüne i ngēma Tupanamaã rüxuwänügüxü. Rü ngēxīcatama nixī i tüxü ínanguxēxü ya yixema Cristuxü rüxoxe.

²⁸ Rü nüxü tacuèx rü yexguma texé tama Moíchéarü mugüga ínügu rü nayexmagu ga taxre rü éxna tomaēxpüx ga duüxügü ga tüxü daugüxü rü tüxü ixugüexü na aixcüma tama naga taxínüxü, rü ãēxgacügü rü noxtacüma tüxü nimèxgü rü tama nüxü tangechaütümügü.

²⁹ Natürü Tupana rü aixcüma yexeraäcü tá nanapoxcue i ngēma duüxügü i tama Nanega ínüexü rü yima nagü ya pecaduarü pirüxü oexü rü Naãe i Ünexü i nüxü ngechaüxümaã guxchigagüxü.

³⁰ Rü meãma nüxü tacuèx rü Tupana rü tama natüçèxma ñanagürü:

“Choma tá nixī i namaã nüxü chacuáxü na tacü tá namaã chaxüxü i guxüma i ngēma chixexü ügüxü. Rü aixcüma tá chanapoxcu”, ñanagürü. Rü yexgumarü ta ñanagürü:

“Choma tátama nixī i nüxna chaçaxü i wüxichigü i chorü duüxügü i norü maxüchiga”, ñanagürü.

³¹ Rü dücax, rü aixcüma namaxü ya Tupana, rü ngēmacèx ega tama naga ixínüēgu rü wüxi i äücümaxüchixü nixī na namēxgu inguxü na tüxü napoxcuxüçèx.

³² Rü dücax, name nixī i nüxna pecuèxächie ga ñuxäcü na yīxü ga yexguma noxri Cristuxü peyauxgu. Rü yexguma ga pema rü yema na peyaxōgüxügagu rü poraäcü guxchaxügü pexü

nangupetü, natürü tama Cristuxü perüxoe rü bai ga írarüwa.

³³ Rü ñuxre ga pema rü duüxügü pemaã naguxchigagü rü guxâpêxewa pexü niçuaixgü. Rü toguãx ga pema rü pegü ipeyaxãgü na yema pemücügürüü ngúxü pingegüxcèx.

³⁴ Rü pema rü pexü nangechaütümüügü ga yema petanüxügü ga yaxögüxü ga poxcupataüwa yexmagüxü. Rü taãëácüma yaxna namaã pexĩnüë ga yema tama yaxögüxü ga pexna napuxüxü ga perü yemaxügü. Rü tama naxcèx pexoegaãë, yerü meãma nüxü pecuèx rü daxügüxü i naãnewa pexü nangêxma i ngêma perü ngêmaxügüarü yexera ixixü, erü tagutáma nagux.

³⁵ Rü ngêmacèx i ñuxmax, rü tama name na nüxü perüxoexü na Cristuaxü peyaxögüxü woo tacü pexü üpetügu. Erü marü nüxü pecuèx rü Tupana rü aixcümamaxüchi tá pexna nanaxã i perü ãmare i maxü i taguma gúxü, erü Cristuaxü peyaxögü.

³⁶ Rü ngêma guxchaxügü i pexü ngupetüxü, rü name nixĩ i yaxna namaã pexĩnüë na penaxüxcèx i Tupanaãrü ngúchaü rü penayaxuxüxcèx i ngêma ãmare i pemaã inaxunetaxü.

³⁷ Erü Tupanaãrü ore i ümatüxüwa rü ñanagürü:

“Paxaxüchi tá wenaxãrü núma naxü ya Cristu. Rü aixcüma täütáma nuxcü ínangu.

³⁸ Natürü yixema tümaãrü ôgagu chopêxewa mexë, rü name nixĩ i guxüguma tayaxõcüma chauxcèx tamaxü. Natürü ngêxguma nüxü tarüxoxgu na tayaxõxü, rü choma rü täütáma tümamaã chataãë”, ñanagürü.

³⁹ Natürü i yixema rü tama ngêma duüxügü i

nüxü rüxoexü i Tupana tá poxcuexürüü tixīgü. Erü yixema rü ngēma yaxōgüxütanüxü tixīgü, rü ngēmacèx tüxü nangēxma i maxü i taguma güxü.

11

Tórü õchiga

¹ Rū ñuxma rü tórü õgagu nixĩ i nüxü icuáxü na aixcüma tá nayauxgüxü i güxüma i ngēma irünguxēēgüxü ga Tupana tamaã ixunetaxü. Rū ngēma tórü õgagu nixĩ i nüxü icuáxü na aixcüma Tupana tá yanguxēēxü i ngēma norü uneta i ñuxma tauta nüxü idauxü.

² Rū ñuxre ga nuxcümaügüxü ga tórü õxigü rü Tupanaãxü nayaxōgü, rü yemacèx ga Tupana rü namaã nataãē.

³ Rū ngēma tórü õgagu nixĩ i nüxü icuáxü na aixcüma yĩxü na Tupana rü norü oremaãmare nangoxēēãxü ga ñoma ga naãne rü üèxcü rü tauemacü rü woramacurigü rü õxtagü. Rū yemaãcü ga Tupana, rü ngürüwa nanangoxēēmare ga güxüma i ngēma ñuxma nüxü idauxü.

⁴ Rū guma nuxcümaücü ga Abé rü Tupanaãxü nayaxō. Rū yemacèx Tupanaga naxĩnü rü nüxna nanaxã ga wüxi ga naxüna ga Tupanacèx yamáxü. Natürü ga naēneē ga Caĩ rü tama Tupanaga naxĩnü rü tama nüxna nanaxã ga yema ãmare ga Tupana nüxü naxwèxexü. Rū yemacèx ga Tupana rü woo tama Caĩmaã nataãē, natürü Abémaã nataãē rü nüxü nixu na mecü yĩxü yerü nayaxō rü naga naxĩnü. Rū ngēmacèx i ñuxmax na woo nayuxü ga Abé, natürü wüxi i tórü cuèxruü nixĩ. Erü nawa nixĩ i nüxü icuáxü na Tupana naxwèxexü na yaxōgüxü rü naga ixĩnüëxü.

5 Rū Enó rü ta Tupanaãxũ nayaxõ rü naga naxĩnũ. Rū yemacèx nixĩ ga namaxãcütama yagaãxũ na tama nayuxücèx. Rū namücügü rü taguma nüxũ inayangaugü, yerü Tupana nayaga. Rū Tupanaãrũ ore i ümatüxüwa nüxũ nixu rü yexguma tauta yagaãgu, ga Enó rü nanaxü ga yema Tupana naxwèxexũ.

6 Natürü taxuacüma Tupana tamaã nataãe ega tama nüxũ yaxögügu. Rū yixema namaã ãmücüchaũxê, rü tanaxwèxe na tayaxõxũ na aixcümamaxüchi nangëxmaxũ i nüma rü aixcüma tüxũ nangüxêxũ ya yixema naxcèx daugüxe rü naga ìnüèxê.

7 Rū yexguma Noemaã yadeaxgu ga Tupana, rü nüma ga Noe rü nayaxõ rü naga naxĩnũ. Rū Tupana rü namaã nüxũ nixu rü tá na ìnanguxêãxũ ga mucü ga taxüchicü ga taguma duüxügü nüxũ daucü rü tá guxüwama inanguanexêcũ. Rū namaã nüxũ nixu ga na naxüãxücèx ga wüxi ga wapuru ga taxüne na tama nayuexücèx ga nüma rü namèx rü nanegü rü naneãxgü. Rū Tupanaga naxĩnũ ga Noe, rü nanaxü ga guma wapuru, rü yemaãcü tama nayue ga nüma rü napatacũãx. Rū yemaãcü Tupanaãxũ nayaxõ. Natürü yema togü ga duüxügü rü tama nayaxögü, rü yemacèx Tupana nanapoxcue. Natürü nüma ga Tupana rü Noexũ nixu na napëxewa namexũ, yerü nüxũ nayaxõ.

8 Rū guma tórü oxu ga Abráũ, rü Tupanaãxũ nayaxõ. Rū yemacèx nixĩ ga naga naxĩnũxũ rü nüxna yaxüxũ ga nanatüchiũãne na nawa naxüxücèx ga yema naãne ga Tupana tá nüxna ãxũ na noxrüxüchi yĩxücèx. Rū yemaãcü nanaxü ga

yexguma Tupana namuxgu. Rü nanatüchiũñewa inaxũñchi ga Abráũ woo tama nüxũ na nacuáxũ ga ngextá tá na naxũxũ.

⁹ Rü yexguma nawa nanguxgu ga yema naãne ga Tupana namaã ixunetaxũ, rü ñoma yexma naxũãneãxürüũmare Ìpata ga naxchirunaxcèxmaãmare naxãchiũ. Rü yexgumarüũtama nixĩgü ga nane ga Ichaá rü nataa ga Acobu, yerü yexguma nayaegu rü Abráũrüü ñoma yexma naxĩãneãxürüũmare nixĩgü ga yema naãnewa. Rü yemaãcü nixĩgü ga guxũma ga nümagü ga na woo Tupana rü namaã inaxunetaxũ ga na noxrüxüchi yĩxücèx ga yema naãne.

¹⁰ Rü yemaãcü ga Abráũ, rü woo ñoma yexma naxũãneãxürüũmare yema nayexma, natürü Tupanaãxũ nayaxõchigüama, yerü nüxũ nacuèx na Tupana tá daxüguxũ i naãnewa na nagaxũ nawa ya yima ñane ya nümatama naxüxüne ya tagutáma iyarüxoxüne.

¹¹ Rü yexgumarüũtama iyixĩ ga Abráũ namèx ga Chara. Rü woo ga na taguma naxãxãcüchiréxũ yerü marü iyaxüchi, natürü ixãxãcü yerü iyaxõõma na Tupana rü aixcüma tá yanguxẽẽãxũ ga yema norü uneta ga tá na naxãxãcüxũ.

¹² Rü yemaãcü ga Abráũ rü woo marü yaguãxüchi na yĩxũ, natürü düxwa nüxũ nayexma ga wüxi ga nane, rü gumawa ne naxĩ ga muxũma ga natagü. Rü ñuxma rü ñoma èxtagürüü namuxüchi, rü ñoma naxnücü ya taxuacüma yaxugücürüü nixĩgü, yerü yemaãcü Abráũmaã inaxuneta ga Tupana.

¹³ Natürü nümagü ga Abráũ rü Ichaá rü Acobu

rü nayue, rü yemacèx tama nüxü nadaugü ga guxüma ga nataagü i ñuxma ngëxmagüxü, rü tama namaã inacuèxgü ga yema naãne ga noxri Abráümaã nüxü yaxuxü ga Tupana. Natürü Tupanaãxü nayaxõgüama, rü yemacèx nüxü nacuèxgü rü Tupana rü tá aixcüma na yanguxëãxü ga yema norü uneta ga namaã nüxü yaxuxü. Rü nataãëgü yerü nüxü nacuèxgü na täütáma guxüguma ñoma ga naãnewa na nayexmagüechaxü, rü yemacèx nüxü nixugüe na to i nachiuãnecüãxrüümare yixügüxü ga ñoma ga naãnewa.

¹⁴ Rü nümagü rü yema oremaã meãma tüxü nüxü nacuèxëe na tama ñoma ga naãneguxicatama naxĩnüëxü natürü ínguxëëgüãxü i to i nachica i daxügüxü i naãnewa ngëxmaxü.

¹⁵ Rü nümagü rü yexguma chi nanaxwèxegügu ga naxcèx na nawoeguxü ga yema naãne ga noxri nawa ne naxixü, rü täü chima nüxü naguxcha rü chi naxcèx nawoegu.

¹⁶ Natürü ga nümagü rü nüxü nangúchaügü i ngëma naãne i mexëchixü i daxüwa ngëxmaxü i Tupanaxütawa. Rü yemacèx nixĩ ga Tupana ga tama naxãnexü na nügü yaxuxü na norü Tupana yixü. Yerü nüma ga Tupana rü naxcèx nanamexëe ga wüxi ga ñane ya daxügüxü i naãnewa ngëxmane.

¹⁷⁻¹⁸ Rü Tupana ga noxri rü Abráümaã nüxü nixu rü ñanagürü:

“Cune ya Ichaáwa tá cuxü nangëxma i muxüchixütama i cutaagü”,
ñanagürü. Rü Abráü rü nayaxõ na Tupana rü aixcümaxüchi tá na yanguxëãxü ga yema namaã inaxunetaxü. Rü yemacèx ga yexguma Tu-

pana nüxũ üxgu rü Ichaácèx nüxna nacaxgu na naxcèx yamáãxücèx, rü nüma ga Abráũ rü tama nanachuxu. Rü ínamemare na Tupanacèx yamáãxũ ga guma nane ga nügümaã wüxicacũ.

¹⁹ Yerü nüma ga Abráũ rü nayaxõ na Tupanaãxũ natauxchaxũ na wena namaxèxèèãxũ i yuexũ. Rü yemacèx ga Abráũ rü ínamemare na Tupanacèx nanexũ yamáxũ yerü nayaxõ na Tupana rü wena tá namaxèèãxũ. Rü aixcümáxũchi yemaãcü Abráũcèx nanaxü ga Tupana, yerü woo ñoma marü nayuxürüũ nixĩ ga nane, natürü ga Tupana rü maxücü nüxna nanamu. Rü yema rü wüxi ga tórü cuèxruũ nixĩ na ñuxãcü aixcüma yaxõõxũ ga Abráũ.

²⁰ Rü guma Ichaá rü ta Tupanaãxũ nayaxõ. Rü yemacèx ga yexguma marü nayèxgu, rü nayumüxè rü Tupanana naca na nanegü ga Acobu rü Echaúxũ nangüxèèxücèx. Rü yemaãcü nayumüxè yerü aixcüma nayaxõ na Tupana tá yanguxèèxũ ga yema nüxna naxcèx naçaxũ.

²¹ Rü guma Acobu rü ta Tupanaãxũ nayaxõ. Rü yemacèx ga yexguma marü nayèxgu rü nayuxchaũgu, rü norü caxüxümaã nügü inachixèè rü Tupanaxũ nicuèxüũ. Rü nayumüxè rü Tupanana naca na nataagü ga Yúche nanegüxũ nangüxèèxücèx. Rü yemaãcü nayumüxè yerü aixcüma nayaxõ na Tupana tá yanguxèèxũ ga yema Abráũmaã inaxunetaxũ.

²² Rü guma Yúche rü ta Tupanaãxũ nayaxõ. Rü yemacèx ga yexguma nayuxchaũgu, rü natanüxügümaã nüxũ nixu rü ñanagürü:

“Tataagü rü yixcüra rü tá ínachoxũ i nuã Eq-
uituanewa na nawa naxĩxücèx i ngẽma

naãne ga Tupana tórü օxi ga Abráúmaã nûxû ixuxû. Rû ngẽxguma ngema naxĩxgu, rû chanaxwèxe ya chauxchinèxãgü rû ta ngema nanana na ngẽxma yatèxgüãxücèx”,

ñanagürü.

²³ Rû yemawena rû mucüma ga taunecügü rû nimu ga yema duñxügü ga Equituanewa. Rû yema nachiüãneärü ãẽxgacü, rû tama nanaxwèxe na yexeraãcü yamuëtanüxû, rû yemacèx nanamu na tûxû nadèixücèx ga guxãma ga buxe ga iyatuxe ga yexwacèx ibuetanüxê. Natürü nanatü rû naë ga guma tórü օxi ga Moïché, rû aixcüma Tupanaãxû tayaxögü. Rû yemacèx ga yexguma noxri nabuxgu ga Moïché, rû tomaëxpüx ga tauemacügu itayacüxgü, yerü nûxû tadaugü na namexêchixû rû tama naxcèx tamuüë ga yema Equituaneärü ãẽxgacüärü ore ga woo na naxunagüãxû ga na buxe tûxû nadèixû.

²⁴⁻²⁵ Rû Moïché rû ta Tupanaãxû nayaxõ. Rû yemacèx ga yexguma marü nayèxgu rû tama nanaxwèxe na nügü yaxuxû na Equituaneärü ãẽxgacüxacü ngĩne na yĩxû, yerü naxcèx rû narümemaë na natanüxügü ga Yudíugümaã wüxigu ngúxû yangexû. Rû tama nanaxwèxe na tacü ga ñoma ga naãneärü chixexümaã nügü na nataãëxêxû, yerü nûxû nacuèx rû yema taãë rû paxaãchiruümare nixĩ.

²⁶ Rû yexgumarüü na daxũguxû ga naãnena na yaxûxû ga Cristu na ngúxû yangexücèx, rû yexgumarüü ta nixĩ ga Moïché ga ãẽxgacüpatana na yaxûxû, yerü naxcèx rû narümemaë na natanüxügü ga Yudíugümaã wüxigu ngúxû yangexû. Natürü taxucèxma yema ngúxügu

narüxĩnũ, yerũ nüxũ nacuèx rü tá wüxi i ngunexũgu Tupanaxütawa na nayauxãxũ i norũ natanũ.

²⁷⁻²⁸ Rũ yema na yaxõõxũcèx nixĩ ga Tupanaga naxĩnũxũ ga Moĩché. Rũ yemacèx ga yexguma Tupana namuxgu ga na naxũãxũ ga üpetüchiga, rü nayanguxêê ga yema Tupana namuxũ. Rũ nüma ga Moĩché rü guxũma ga natanũxũgũ ga Yudíugũxũ namu na wüxichigũ ga ĩpatawa yamáãxũcèx ga wüxi ga carneruxacũ na yemagũmaã namaxcuãxũcèx ga naãxpatagũ. Rũ ñanagürũ nüxũ:

“Ñoma i chütaxũgu rü tá Tupana núma Equituanewa nanamu i wüxi i norũ orearũ ngeruũ i daxũcũãx rü tá nanadai ya yima nüxira bucũ ya Equituanecũãxgũ nane i wüxichigũ ya ĩpatawa. Natürũ ngëxguma yima nagũmaã penamaxcuxgu i perũ ĩãxpata, rü tãütáma pechiũgu naxũcu”,

ñanagürũ. Rũ yemaãcũ ga Moĩché rü Tupanaga naxĩnũ yerũ nüxũ nayaxõ. Rũ yemacèx ga yema orearũ ngeruũ ga daxũcũãx rü taxuũma ga Yudíugünexũ nimèx. Rũ yema na yaxõõxũcèx nixĩ ga ĩnaxũxũxũ ga Equituarũ naãnewa, rü tama naxcèx namuũxũ na guma Equituanearũ ãëxgacũ tá namaã nanuxũ. Rũ taguma nüxũ narüxo ga Tupanawe na naxũxũ, yerũ Tupana ya ëxũgucüarũ ngúchaũ naxũ.

²⁹ Rũ yema duũxũgũ ga Moĩchéwe rüxĩxũ rü ta nayaxõgũ. Rũ yemacèx ga yexguma yema Taxtũ ga Dauchiũxũwa nangugũgu, rü yema dexá rü nügũna nixĩgachi, rü nipaaneãchi, rü yéma nichoũ. Natürũ yexguma yema Equituanecũãx ga chu-

raragü ga nawe ngëgüxü nawe ichoügu, rü yexma nayiama, yerü wenaxärü nügüna naxĩ ga yema dexá.

³⁰ Rü yexguma guma ããne ga Yericúwa nangugügu ga yema duüxügü, rü taxucürüwama nichocu, yerü guxüwama naxãxtapüx. Natürü Tupanaãxü nayaxögü, rü yemacèx Tupanaga naxĩnüë rü 7 ga ngunexü nüxü Ínichoeguãchitanücüü, yema Tupana namaã nüxü ixuxürüü. Natürü yexguma norü 7 ga ngunexüwa nanguxgu, rü nüëchama niwëxgütapüx, rü yemaãcü nichocu.

³¹ Natürü yema nge ga Yericúcüãx ga Raá, rü woo chixri imaxü ga noxrix, natürü yexguma yéma nangugügu ga yema taxre ga Yudíugü ga bexma ngugütaewa yéma İxü, rü ngĩma iyixĩ ga nüxü nangüxëëxü. Rü yemacèx tama yema togü ga Yericúcüãx ga tama Tupanaga İnüëxürüü iyu, yerü Tupanaãxü iyaxõ.

³² ¿Rü ñuxma rü tacü i togü i duüxügüchigaxü tá pemaã chixuxü? Rü changechica na pemaã nüxü chixuxücèx i nachiga ga yema nuxcümaügüxü ga ãëxgacügü ga Yedeü rü Bará rü Chaüchóü rü Yeté rü Dabí rü Chamue, rü guxüma ga nuxcümaügüxü ga Tupanaärü orearü uruügü.

³³ Rü yema na yaxögüãxücèx nixĩ ga Tupana nüxü rüngüxëëxü. Rü yemaãcü to ga nachiüãnegüarü ãëxgacügüxü narüporamaëgü, rü meãma norü duüxügümaã inacuëxgü rü aixcüma nanayauxgü ga yema Tupana namaã ixunetaxü. Rü yemacèx ga yexguma woo aitanügu yatëxcuchigüãgu, rü taxuüma namaã naxü ga aigü yerü Tupana nüxna nadau.

³⁴ Rü yexguma norü uwanügü üxüxetüwa ya-

wocuxgu, rü taxuŭma nüxŭ naxüpetü rü tama nixae, yerü Tupanaãxŭ nayaxögü rü nüma rü nüxna nadau. Rü yexguma togü taramaã nadaixchaŭgu, rü Tupana nüxŭ narüngŭxëê na taxuŭma nüxŭ üpetüxçèx. Rü yexguma naturaegu rü norü uwanügü nadaixchaŭgu, rü Tupana nana-poraexëê. Rü yexguma to ga nachiŭãneãrü chur-aragümaã nügü nadaixgu, rü yema togü ga chur-aragüxŭ narüyexeragü.

³⁵ Rü nayexma ga ngexŭgü ga yuexacüxŭ, natürü yema naxãcügü rü wenaxãrü ínarüdagü yerü Tupanaãxŭ nayaxögü. Natürü nayexma ga togü ga poraãcü ngüxŭ ingegüxŭ yerü norü uwanügü yemaãcü namaã nachopetü na Tupanaxŭ ínatèxgüxçèx. Natürü ga nümagü rü tama Tupanaxŭ ínatèxgü rü yemacèx nayue, yerü naxcèx rü narümemaë nixĩ na wena namaxëxŭ rü nayauxgüãxŭ i ngëma maxŭ i taguma gúxŭ.

³⁶ Rü nayexma ta ga ñuxre ga togü ga yaxögüxŭ ga duŭxŭgü nüxŭ cügüexŭ, rü yaçuaixgüxŭ, rü cade-namaã yanèixgüxŭ, rü poxcupataŭgu nawocuxŭ.

³⁷ Rü ñuxre ga nümagü rü nutamaã ínanamuxŭchigü rü yemaãcü nanadai. Rü togü rü nayawãixyegü rü nayue. Rü ñuxre ga togü rü ngüxŭ nüxŭ ningexëêgü na Tupanaxŭ ínatèxgüxçèx. Rü togü rü taramaã nanadai. Rü ñuxre ga nümagü rü nu ne nanaxĩmare rü carneruchèxmüŭ rü chibuchèxmüŭmaãmare nixãxchiru. Rü taxuŭma nüxŭ nayexma, rü nanaxĩxãchiãëgü yerü norü uwanügü rü chixri namaã nachopetü.

³⁸ Rü ñoma ga naãnecŭãx rü naxchi naxaie, natürü Tupana rü nüxŭ nangechaŭ. Rü ñoma ga naãnewa rü norü uwanügüchaxwa nu ne nanaxĩmare

ga taxúema íxãpataxúwa. Rû ngürüanegu nîpexútanümare yerü nangepatagü.

³⁹ Rû guxúma ga yema nuxcümaüğüxü ga duüxüğü woo norü ôgagu Tupana namaã na taãëxü, natürü taxuüma ga yema duüxüğü rü nüxü nadau ga yema mexüğü ga Tupana namaã nüxü ixuxü.

⁴⁰ Rû yemaãcü namaã nangupetü ga yema duüxüğü, yerü ga Tupana rü tagu narüxînü rü tama nanaxwèxe na nüxîra nüxîca yamexëëgüãxü, natürü nanaxwèxe na tamaã wüxigu yamexëëgüãxü. Rû ñuxma i yixema na yaxôgüxü, rü yema nuxcümaüğüxü ga duüxügürüü Tupanaârü duüxüğü tixîgü, yerü Nane ya Ngechuchu rü guxãcèxma nayu. Rû wüxi i ngunexü rü tá taxcèx núma naxü na nügüxütawa tüxü nagagüxüçèx na ngema ingëxmagüechaxüçèx.

12

Name nixî i Ngechuchucümagu taxî

¹ Rû ñuxma na nüxü icuáxü na ñuxãcü aixcüma Tupanaãxü yaxôgüãxü ga guxúma ga yema nuxcümaüğüxü ga duüxüğü, rü ngëma rü wüxi i tórü cuèxruü nixî na ñuxãcü Tupana naxwèxexü na naxcèx imaxëxü. Rû ngëmacèx i ñuxmax, jrü ngîxã nüxü tarüxoe i guxúma i ngëma pecadu i tüxü ítüexëëxü rü tüxü naguxchaxëëxü na meã yaxôgüxü! ¡Rü ngîxã paxa naxcèx tadaugü na meã Tupanacèx imaxëxü rü guxüguma aixcüma naxüxü i ngëma tüxü nanaxwèxexü!

² Rû name nixî i tanangugü na ñuxãcü namaxüxü ga Ngechuchu rü nagu taxî i nacüma. Yerü nüma nixî ga nuxcüma nagu naxînüxü

na ñuxãcü tórü õgagu tá tüxü namaxëxëxü rü nüma nixĩ i tüxü nangüxëxü na aixcüma meã yaxõgüechaxüçèx na ngëmaãcü naxütawa ingugüxüçèx. Rü nüma rü tama nügü nachuxu na curuchawa ngúxü yangexü, rü tama nagu narüxĩnü ga yema ãne na yangexü, natürü nataãxüchi yerü nüxü nacuèx na yemawena rü tá muxüma i duüxügü nayauxgüxü i maxü i taguma gúxü. Rü ñuxma rü Tupanaärü tügünecüwawa narüto na ngema guxãärü ãëxgacü yiixüçèx.

³ Rü name nixĩ i penangugü rü nagu perüxĩnüë na ñuxãcü ga Ngechuchu rü yaxna namaã naxĩnüxü ga yema ngúxü ga nüxü yangexëëgüxü ga yema duüxügü ga pecaduãxgüxü. Rü nüma ga Ngechuchu rü yemaãcü yema ngúxümaã yaxna naxĩnü na pema rü tama nüxü perüçauxüçèx rü tama nüxü perüxoexüçèx na nüxü peyaxõgüxü.

⁴ Rü ñuxma i pema na peyaxõgüxü, rü ngúxü pingegü erü pecaduxü perüxoe. Natürü taxüema ga petanüwa rü yemacèx Cristurüü yuwa tangu.

⁵ Rü name nixĩ i nüxna pecuèxãchie i norü ore ya Tupana i namaã pexü yaxucuxëgüxü i ñuxma na naxãcügü pixĩgüxü. Erü ngëma norü ore i ümatüxüwa rü ñanagürü:

“Pa Chaunex, ¡tãxü i nüxü cuxoxü i ngëxguma cuxü icharüwëxãchixëëgu! ¡Rü tãxü i cuyarümaxãchixü i ngëxguma cuxü chaxucuxëgu!

⁶ Erü nüma ya Cori ya Tupana rü tüxü inayarüwëxãchixëë ya yixema tüxü nangechaüxë. Rü tüxna nanaçuaixca ya yixema naxãcüxü tüxü nayaxüxe, na ngëmaãcü tüxü nangüxëxüçèx na ñuxãcü nanaxwëxexü na naxcèx tamaxüxü”,

ñanagürü.

⁷ Rū ngēmacèx i pemax, rü name nixĩ na yaxna namaã pexĩnüèxũ i ngēxguma Tupana pexna naçuaixcagu. Erü ngēxguma ngēmaãcü pemaã yixĩgu, rü pexũ nüxũ nacuèxēẽ na aixcüma naxãcügü pixĩgüxũ. Erü guxũma i papá rü inayanawēxãchixēẽ i ngēma aixcüma naxãcügü ixĩgüxũ.

⁸ Natürü ngēxguma chi Tupana tama pexũ iyarüwēxãchixēẽgu, naxãcügüxũ iyanawēxãchixēẽxürüũ, rü ngēmawa tá nüxũ pecuèx na tama aixcüma naxãcügü pixĩgüxũ, rü ngenatüxũ pixĩgüxũ.

⁹ Rū wüxichigü i yixema ga yexguma ibuegu, rü tanatügü rü tüxũ taxucuxēgü, rü yixema rü tümaga taxĩnüẽ rü tüxũ tangechaũgü. Rū ngēmacèx i ñuxma rü yexeraãcü tanaxwèxe na naga ixĩnüèxũ ya Tanatü ya daxügücü na ngēmaãcü nayaxuxüçèx i maxũ i taguma gúxũ.

¹⁰ Rū tanatügü rü wüxi i paxaãchicèxmare tüxũ taxucuxēgü na tüma tanaxwèxegüxũãcüma imaxēxüçèx. Natürü ya Tupana rü aixcüma tórü mexüçèx nixĩ i tüxũ iyanawēxãchixēẽxũ na naxrüũ ixüünegüxüçèx.

¹¹ Rū aixcüma tama tataãēgü i ngēxguma Tupana tüxũ iyarüwēxãchixēẽgu, erü tüxũ nangux. Natürü ngēmawena i ngēxguma naga ixĩnüēgu rü yan-guxēēgu i ngēma tamaã nüxũ yaxuxũ, rü aixcüma tataãēgü.

Naxãücüma na tama Tupanaga ixĩnüèxũ

¹² Rū ngēmacèx i ñuxma na ngúxũ pingegüxũ rü pipaexũ na Tupanawe perüxĩxũ, rü name

nixĩ i pegü peporaexẽẽãma na noxrirüütama meã peyaxõgüxüçèx.

¹³ Rũ name nixĩ i naxcèx pedaugü na Tupana pexũ naxwèxexüãcũma aixcũma meã pemaxèxũ, na yíxema ñuxma tama meã yaxõgüxe rü meã tayaxõgüxüçèx.

¹⁴ ¡Rũ naxcèx pedèux na guxũ i duũxügümaã pemecũmaxũ! Rũ ngèxgumarüũ ta name nixĩ i naxcèx pedau na Tupanapèxewa naxüünexũ i perü maxũ. Erü yíxema tama Tupanapèxewa üünexè rü tãütáma tórü Corixũ tadau.

¹⁵ ¡Rũ pegüna pedaugü na taxúema nüxũ oxüçèx i ngẽma ngüxèẽ i Tupana tüxũ nangechaũãcũma tüxna ãxũ! Erü tama tanaxwèxe na texé petanüwa Cristuchi aixũ rü ngẽmaãcü togüxũ chixexũmaã taxucuxèxũ na Cristuna tixũgachixüçèx.

¹⁶ Rũ tama name i texé i petanüwa rü naĩ i nge-maã na itapexũ. Rũ tama name na texé tümaãrũ ngẽmaxüçèx Tupanaxũ na oxũ. Rũ yemaãcü nanaxü ga guma nuxcũmaüçü ga Acobueneẽ ga Echaú. Yerü yexguma nataiyagu rü wüxi ga õnacèx nüxũ naxo ga guxũma ga yema nüxna üxũ ga nanatü chi nüxna ãxũ.

¹⁷ Rũ pema nüxũ pecuèx rü yemawena ga yexguma nayauxchaũãgu ga yema noxri nüxna üxũ, rü marü taxucürüwama nanayaxu, yerü marü naẽneẽ ga rübumaëcũna tanaxã ga nanatü. Rũ nüma ga Echaú rü woo poraãcü naxaxu, natürü marü taxucürüwama ñuxãcü nanayaxu. Rũ ngẽmawa nüxũ tacuèx na ñuxãcü naxãücũmaxũ na tórü ngẽmaxüçèx Tupanaxũ ixoxũ.

¹⁸⁻²¹ Rũ nuxcũma ga tórü oxigü ga Moĩchéwe rüxĩxũ, rü nüxũ naxĩnüẽ ga Tupanaga ga yexguma

nūxŭ yangaicagūgu ga guma mēxpŭne ga Chinaŭgu ãegane. Rŭ nūxŭ nadaugŭ ga na yayauraxŭ ga guma mēxpŭne rŭ poraãcŭ naxēānexŭ rŭ poraãcŭ buanecŭ ixŭxŭ rŭ yabēixbēxanexŭ rŭ yaduru-anexŭ. Rŭ poraãcŭ namuŭē ga yema duŭxŭgŭ, yerŭ nūxŭ naxīnŭē ga wŭxi ga corneta ga tagane rŭ Tupana ga tagaãcŭ yēma ñacŭ:

“Ngēxguma chi wŭxie i petanŭwa daa mēxpŭnewa ŭxgu jrŭ noxtacŭma nutamaã tŭxŭ ípemuxŭchiãcŭma tŭxŭ pimá! Rŭ woo wŭxi i pexŭna yixŭgu jrŭ ngēxgumarŭŭ ta ípenamuxŭchiãcŭma peyamá!”

ñanagŭrŭ. Rŭ yexguma yadeaxgu ga Tupana, rŭ poraãcŭ namuŭē ga yema duŭxŭgŭ. Rŭ norŭ muŭmaã Tupanaxŭ nacèèxŭgŭ na íyachaxãchixŭcèx ga namaã na yadexaxŭ. Rŭ yema na poraãcŭ naxãŭcŭmaxŭchixŭ ga yema nūxŭ nadaugŭxŭ, rŭ yemacèx nixŭ ga nŭmatama ga Moŭché ga ñaxŭ:

“Chorŭ muŭmaã chidurŭx i ñŭxmax”, ñaxŭ. Rŭ yemaãcŭ nixŭ ga namaã nangupetŭxŭ ga yema duŭxŭgŭ ga Moŭchémaã nayauxgŭxŭ ga yema nŭxŭraŭxŭ ga Tupanaãrŭ mugŭ. Natŭrŭ i pemax, Pa Chaueneēgŭx, rŭ tama yemaãcŭ pexŭ naxŭpetŭ ga yexguma penayauxgŭgu ga Tupanaãrŭ ore i ngexwacaxŭxŭ i Cristuchiga ixŭxŭ.

²² Rŭ ñŭxma i pema rŭ taxucèxma pemuŭē, yerŭ ga Cristu rŭ taxcèx nayu na Tupana ya guxŭguma maxŭcŭxŭtawa tŭxŭ nagagŭxŭcèx, na guxŭguma norŭ ñāne ya daxŭgune ya Yerucharéŭgu ãeganewa ingēxmagŭxŭcèx. Rŭ ngēma tá tangutaquēxegŭ namaã i ngēma muxŭchixŭma i norŭ orearŭ

ngeruügü i daxũcũãx na wüxigu namaã Tupanaxũ icuèxüügüxcèx.

²³ Rũ ñuxma i pemax, rü marü natanüxügü pixĩgü i guxüma i ngẽma togü i duũxügü i Tupanaãrũ poperawa ngoxégagüxũ. Rũ marü naxcèx pexĩ ya Tupana ya yima guxãnatáma cacü. Rũ marü natanüwaama pexügü i guxüma ga yema duũxügü ga mecümagüxũ ga yuexũ ga Tupana imexẽégüxũ.

²⁴ Rũ marü naxcèx pexĩ ya Ngechuchu ga taxcèx yucü na tüxũ namaxẽxẽxüxcèx, ngẽma Tupanaãrũ uneta i ngexwacaxüxũ tamaã nüxũ ixuxürüũ. Rũ nagümaã pexũ iyanaxoxẽẽ ga perü chixexügü na aixcüma Tupanapẽxewa pimexüxcèx. Rũ yexguma nüxcümaxücü ga Abégü inabaxẽẽ ga naeneẽ rü Tupana rü poxcu naxuegu. Natürü yexguma Cristugü ibaxgu rü Tupana rü duũxügümaã nanaxuegu i maxũ i taguma gúxũ.

²⁵ Rũ ngẽmacèx name nixĩ i pexuãégü na tama nüxũ pexoexüxcèx ya yima Tupana ya ñuxma tamaã idexacü. Rũ dücax yema nuxcümaügüxũ ga tórü oxigü ga Moĩchéwe rüxĩxũ rü taxucürüwa Tupanachaxwa nibuxmü na tama napoxcueãxüxcèx ga yexguma Tupanaxũ naxoegu rü tama naga naxĩnüëgu ga yexguma Moĩchéwa Tupana yaxucuxëgügu. Rũ yema na taxucürüwa Tupanachaxwa yabuxmüxũ ga nümagü, rü yexeraãcü tüxũ naguxcha i yixema na naxchaxwa ibuxmüxũ ega tama naga ixĩnüëgu i ñuxma na Cristuwa tüxũ yaxucuxëgüxũ i nüma ya Tupana i daxügüxũ i naãnewa ngẽxmacü.

²⁶ Rũ yexguma Moĩchéwe naxĩxgu ga tórü oxigü, rü Tupana rü nagamaã nayaduruxanexẽẽ. Natürü i ñuxma rü ñanagürü:

“Wena táxarü chayaduruxanexêẽ. Natürü ngẽxguma ngẽmaãcü chanaxüxgu rü tâütáma ñoma i naãnexĩca chiduruxêẽ, natürü üèxcü rü woramacurigü rü êxtagü rü tá ta chayaduruxgüxêẽ”,

ñanagürü.

²⁷ RÜ yema na:

“Wena táxarü chayaduruxanexêẽ”, ñaxü, rü ngẽmawa nüxü tacuèx rü guxüma ga yema naxüxü i tama guxügucèx ixĩxü, rü Tupana tá inayanaxoxêẽ na ngẽma guxügucèx ixĩxüxĩcatama na íyaxügüxcèx.

²⁸ RÜ ngẽma na tórü ãëxgacü na yĩxü ya Tupana, rü guxügucèx nixĩ, rü tagutáma inayarüxo na noxrü ixĩgüxü. RÜ ngẽmacèx name nixĩ na Tupanana moxê ixãgüxü, rü nüxü ingechaügüãcüma rü nüxü imuüëãcüma nüxü icuèxüügüxü, ngẽma nüma nanaxwèxexürüü.

²⁹ Erü tórü Tupana, rü ñoma wüxi ya üxürüü aixcüma inayanaxoxêẽ i guxüma i tórü chixexü.

13

Ñuxãcü Tupanaxü tataãëxêẽ

¹ RÜ ñuxma rü tama name na nüxü perüçhauexü na wüxichigü pegü pengechaügüxü ñoma peeneëxü pengechaüxürüü.

² Tama name na nüxü ipeyarüngümaëxü na meãma penayaxuxü i ngẽma duüxügü i pepatawa ngugüxü. Erü nüxü tacuèx rü nümaxü ga yemaãcü naxügüxü rü ñuxguacü rü tama nüxü nacuáãcüma bexma Tupanaärü orearü ngeruügü i daxüçüãxü meã nayauxgü.

³ Rū name nixĩ i nūxna pecuèxãchie i ngēma duũxügü i poxcuexũ, ñoma pema rü ta naxrũũ pepoxcuexũrũũ. Rū ngēxgumarũũ ta name nixĩ nūxna pecuèxãchie i ngēma duũxügü i togü ngúxũ nūxũ ingexēēgũxũ, erü ngürũãchi tá ta ngēmaãcü pexũ nangupetü.

⁴ Rū ngēma yatügü i ãmaxũ rü name nixĩ i meã naxmèxmaã namaxē rü tüxũ nangechaũgü. Rū ngēxgumarũũ ta i ngexũgü, rü name nixĩ i meã natemaã namaxē rü nūxũ nangechaũgü. Erü Tupana rü aixcüma tá nūxna naca rü tá nanapoxcue i ngēma duũxügü i naĩ i ngemaã rü ěxna naĩ ya yatümaã ipexũ. Rū ngēxgumarũũ tá ta tüxũ napoxcue ya guxãma ya yixema ngemèxãcüma rü ngeteãcüma tügümaã maxēmarexe.

⁵ Rū tama name na dĩeruguama perũxĩnũẽxũ. Rū name nixĩ i namaã petaãēgü i ngēma marü pexũ ngēxmaxũ. Yerü Tupana rü ñanagürü:

“Tagutáma cuxna chixũ, rü tagutáma cuxũ íchatèx”, ñanagürü.

⁶ Rū ñuxma na nūxũ icuáxũ na ngēmaãcü tamaã inaxãũxũ, rü ngēmacèx tama taxãne na ñagũxũ:

“Nüma ya Cori nixĩ ya choxũ rüngũxēēcü. Rū ngēmacèx taxucèxma chamuũ. Erü taxucürüwama texé tacü rü chixexũ chomaã taxũ”, ñagũxũ.

⁷ Rū name nixĩ i nūxna pecuèxãchie ga yema perü dauruũgü ga noxri pemaã icuáxũ rü pemaã nūxũ ixugũxũ ga Tupanaãrũ ore. Rū name nixĩ i nagu perũxĩnũẽ ga na ñuxãcü meã namaxẽxũ pepẽxewa rü ñuxãcü meã yaxõgüãcüma nayuexũ. Rū name

nixĩ ga nüma yaxõgüãxürüü meã peyaxõgü i pe-max.

⁸ Rũ nüma ya Ngechuchu ya Cristu rũ guxũguma nayanguxẽẽ i ngẽma tamaã nüxũ yaxuxũ. Rũ nuxcüma rũ nayanguxẽẽ ga norü ore, rũ ñuxma rũ ta nayanguxẽẽ. Rũ guxũgutáma ngẽmaãcü nixĩ. Rũ ngẽmacèx tanaxwèxe na aixcüma nüxũ yaxõgüxũ.

⁹ Rũ tama name i peyaxõgü i ngẽma nguxẽẽtaegü i tama toma pexũ namaã tangúexẽẽxũ i tama Tupanaãrũ ixĩgüxũ. Rũ nuxcüma rũ nagu taxĩ ga yema mugü ga Moĩché ümatüxũ ga tüxna nachuxuxũ na tacü ixüxũ rũ tacü ingõxũ. Natürü yema mugü rũ taguma tüxũ naporaexẽẽ ga na Tupanacèx imaxèxũ. Rũ ngẽmacèx tanaxwèxe na Tupana ya tüxũ ngechaũcüwa nayaxuxũ i tórü pora na aixcüma naxcèx imaxèxücèx.

¹⁰ Rũ ngẽma duũxũgü i Moĩchearũ mugügu ìxũ, rũ Tupanacèx naxũna nadai na tama napox-cueãxũcèx naxcèx i norü pecadu. Natürü tama nüxũ nayaxõgü ya Cristu ga tórü pecaducèx yucü. Rũ ngẽmacèx taxucürüwama taxrũũ nanayauxgü i ngẽma ngũxẽẽ i Cristu nüxna uaxũxũ.

¹¹ Rũ ngẽma duũxũgüarũ paigüarũ ãëxgacü, rũ tupaucawa nanange ya nagü i naxũnagü na Tupanana naxããxũcèx na tama Tupana napoxcuexũcèx i ngẽma duũxũgü. Natürü naxũnegü i ngẽma naxũnagü, rũ ããneãrũ Ìxpemawa nayanagügü.

¹² Rũ yexgumarũũ ta ga Ngechuchu rũ ããneãrũ Ìxpemawa ngüxũ ninge rũ nayu na nagümaãtama Tupanacèx yaxüünegüxèẽãxũcèx i duũxũgü.

¹³ Rũ ngẽmacèx i yixema, rũ name nixĩ i nüxna tixĩgachi i ngẽma mugü ga Moĩché ümatüxũ,

rü name nixĩ i Ngechuchucèx taxĩ. Rü woo duũxügü tüxũ cugüegu, yema Ngechuchuxũ na nacugüexũrüũ, rü name nixĩ i naxrüũ yaxna namaã taxĩnüë.

14 Erü yixema na yaxõgüxũ, rü tãütáma ñoma i naãne i paxa tá gúxũwa tangẽxmagüecha. Erü daxüguxũ i naãnewa tüxũ nangẽxma i tachica. Rü ngẽma tá nixĩ i ingugüxũ na guxügutáma Tupana-maã ingẽxmagüechaxũcèx.

15 Rü ngẽmacèx tanaxwèxe i Ngechuchu ya Cristuégagu guxüguma Tupanaxũ ticuèxüügü. Rü ngẽma na taèxmaã nüxũ icuèxüügüxũ, rü ngẽma nixĩ i ãmare i mexũ i nüxna ixãxũ.

16 ;Rü tãxũ i nüxũ ipeyarüngümaẽxũ na togüxũ perüngũxẽxũ rü namaã pengauxũ i perü ngẽmaxügü! Erü ngẽma nixĩ i ãmare i Tupanana pexãxũ i aixcüma namaã nataãxũ.

17 ;Rü naga pexĩnüë i ngẽma perü dauruügü i pemaã icuèxgüxũ, rü penaxüx i ngẽma pemaã nüxũ yaxuxũ! Erü númagü rü Tupanapëxewa pexna nadaugü na meã pemaxèxüçèx erü nüxũ nacuèxgü na Tupana tá nüxna çaxũ i nachiga na ñuxãcü pexna nadaugüxũ. Rü name nixĩ i meã namaã pemaxè i ngẽma perü dauruügü na wüxi i taãe na yĩxüçèx i ngẽma norü puracü rü tama wüxi i norü guxchaxũ na yĩxüçèx. Erü ngẽxguma chi wüxi i norü guxchaxũ yixĩgu i ngẽma norü puracü na pexna nadauxũ, rü pema rü chi taxuũma i mexũ nawa peyaxu i ngẽma norü puracü.

18 Rü name i toxcèx peyumüxègü. Erü toõëwa nüxũ tacuèx na aixcüma meã tayangüxẽxũ i ngẽma puracü i Tupana toxna ãxũ rü tanaxwèxe na guxüguma ngẽmaãcü tanaxüxũ.

19 Rū ngēma guxũārū yexera pexna naxcèx chaçaxũ nixĩ na peyumũxēgũxũ na Tupana paxa pexcèx choxũ taeguxēẽxũcèx.

Yema duũxũgũxũ narũmoxẽ rü naxcèx ínaca na Tupana nüxũ rüngũxēẽxũ

20-21 Rū ñuxma chanaxwèxe i poraãcü pexũ narüngũxēẽ ya Tupana ya tórü taãxēẽruũ rü tórü ngüxmüẽxēẽruũ ixĩcü. Rū nũma nixĩ ga yuwa ínadxēẽãxũ ga tórü Cori ya Ngechuchu ya Cristu ya guxũma i yaxõgũxũārū dauruũ ya guxãārū yexera ixĩcü. Rū ñuxma na curuchagu taxcèx nabaãxũ ga guma nagü ga tüxũ nüxũ cuèxēẽcü na ñuxãcü guxũguma tüxũ nangechaũxũ ya Tupana, rü chanaxwèxe na nũma ya Tupana pexũ yamexēẽgũxũ rü pexũ nangũxēẽxũ na aixcüma guxũma i perü maxũwa pimexũcèx. Rū ngēxgumarũ ta chanaxwèxe na Ngechuchu ya Cristuwa tüxũ nangũxēẽxũcèx ya Tupana na nũma nanaxwèxexũãcüma ixĩgũxũcèx. Rū ñuxma tanaxwèxe i guxũguma yima Cristuxũ ticuèxũũgü. Rū ngēmaãcü yĩ.

22 Pa Chaueneẽgũx, pexũ chacèxũ na yaxna namaã pexĩnüẽxũ i ñaã noxretama i ore i pexũ namaã chataãxēẽxũ rü pexũ namaã chaxucũxũ.

23 Rū chanaxwèxe na nüxũ pecuáxũ rü taeneẽ ya Timutéu rü marü ínanguxuchi ga na napoxcuxũ. Rū ngēxguma paxa nuã chauxũtawa nanguxgu, rü tá ngēma petanũwa chanaga i ngēxguma pexũ íchayadèuxgu.

24 ¡Rü nüxũ perũmoxēgü i guxũma i ngēma perü dauruũgü i pemaã icuáxũ! ¡Rü ngēxgumarũ ta nüxũ perũmoxēgü i guxũma i togü i taeneẽgü i

yaxõgũxũ! Rũ taeneẽgũ i Itáriaanewa ngẽxmagũxũ
rũ ta pexũ narũmoxẽgũ.

²⁵ ;Rũ Tupana poraãcũ pexũ rüngũxẽẽx i guxãma
i pemax! Rũ ngẽmaãcũ yĩ.

Rũ nuãma pexna.

**Tupanaarü Ore i Tóru Cori ya Ngechuchu ya
Cristuchiga
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

9d5dc22a-30be-5d26-85a9-76047f4c89e6